

Kuyantika 1  Yobi

Kuyantika 2

Kuyantika 3

Kuyantika 4


Kuyantika 5

Kubasika-Levi


Kutanga-Kulonga

Yozue

Bazuzi-Ruti



1 Samuele, Bankunga

2 Samuele, 1 Bansangu 

MIKANDA *ya* 2 Samuele ti 1 Bansangu

Baleso 14 sambu na bana ti bajeune ya ecodim



Musoniki: *Mama Lorella Rouster. MCE*

Edition 2024

Le Projet MWINDA—Ministères pour Chaque Enfant
Merci à www.freebibleimages.com/SweetPublishing sambu na dessein.

ecmafrica@ecmafrica.org

Mikanda ya 2 Samuele, 1 Bansangu, & Bankunga**Kimfumu ya Ntotila Davidi****Page**

1 Davidi dilaka lufwa ya Saule. 2 Samuele 1.....	3
2 Davidi kumaka Ntotila ya Yuda. 2 Samuele 2.....	7
3 Davidi kumaka Ntotila ya Israele ya mvimba. 2 Samuele 5.....	10
4 Davidi vutulaka Sanduku ya Nzambi na Yeruzalemi na yangalala ti kukina. 2 Samuele 6, 1 Bansangu 13, 15.....	14
5 Davidi zolaka kutunga Tempelo, kansi Nzambi vandaka na lukanu ya nkaka. 2 Samuele 7, 1 Bansangu 17, 22.....	18
6 Davidi wilaka Mefibosheti mawa. 2 Samuele 9.....	22
7 Davidi kubwaka na masumu ya nene. 2 Samuele 11.....	25
8 Davidi balulaka ntima ngolo. 2 Samuele 12, Bitini ya Bankunga 32, 38, 51.....	29
9 Mwana ya Davidi Absalomi yibaka kimfumu. 2 Samuele 15-16.....	33
10 Absalomi fwaka, ti kimfumu vutukaka na Davidi. 2 Samuele 18-19 :1.....	36
11 Davidi nungaka na bitumba mingi, ebuna yandi yimbaka nkunga sambu na kumisa Nzambi. 2 Samuele 22, Bankunga 18.....	39
12 Davidi tubaka bandinga ya nsuka. 2 Samuele 23.....	43
13 Davidi buyaka kupesa makabu ya yandi me futa ve sambu na yo. 1 Bansangu 21: 18-28, 2 Samuele 24 :18-25.....	46
(Beto ta mona lufwa ya Davidi na nkanda ke kwisa na nima ya 2 Samuele, 1 Bantotila.)	
14 Revision, 1 & 2 Samuele, 1 Bansangu, Bankunga.....	49
Bangindu Nki Mutindu Kulonga Mikanda ya Bible.....	50
Balinya ya Ntangu, 2 Samuele, Bankunga.....	51-52

Leso 1 Davidi dilaka lufwa ya Saule.

2 Samuele 1

I. Preparasio ya Moniteur—

Leso na nkufi :

Ata Saule bakaka yandi na kimbeni ti salaka yandi mbi bamvula mingi, Davidi bakaka yandi na kimbeni mpidina ve. Na nima ya lufwa ya Saule, yandi dilaka ngolo ti yandi tubaka kaka bandinga ya kitoko sambu na yandi.

🎯 Kikuma ya lesa :

Bana ta sala bantu yonso mbote. Bo ta baka bantu na kimbeni ve.

❤ Verse ya bubu yai :

Kana muntu me sala beno mbi,/ beno vutula yandi mbi na mbi ve./ Kansi beno meka na kusala/ mambu yina kele ya mbote/ na meso ya bantu yonso. Roma 12 :17

🗨 Bankunga ya kwenda nzila mosi ti lesa :

Beto Vutula Mbi Ve, Ve, Ve !

Beto vutula mbi—ve, ve, ve ! } (4x)
Beto pesa yo na Nzambi.

Kuzuze ke kisalu ya Nzambi } (4x)
Kansi ya beto bantu ve.

Beto zola bambeni na beto } (4x)
Beto pesa bo na Nzambi.

II. Revisio—

• Kuyindula diaka baleso me luta :

Na mukanda ya 1 Samuele, beto me mona bantu tatu ya nene—Samuele, Saule, ti Davidi.

- Na kati na bo, nani ntotila ya ntete ya Israele ? (Saule)
- Nani profete ya tulaka mafuta na ntu sambu na kusonga nani ta kuma ntotila ? (Samuele)
- Nani mvungi to ngungudi ya sonikaka bankunga mingi ya kele na Bible na

beto ?
(Davidi)

Na mukanda ya 1 Samuele, beto monaka luzingu ya Davidi na ntwala yandi vandaka kuyala bonso mfumu. Na mukanda ya 2 Samuele, beto ta mona luyalu na yandi bonso mfumu to ntotila ya Israele.

III. Kulonga Leso Yai—

➡ Kuyantika :

- Keti Saule vandaka kusala Davidi mbote ? (Mbala mingi ve. Yandi vandaka kuzomba Davidi sambu na kufwa yandi.)
- Keti Davidi salaka Saule mbi ntangu yina ? (Ata mbala mosi ve.)

🌟 Developpement (Malongi ya nene ya lesa yai na banti ya malongi 3) :

1.1 Davidi waka nsangu ya lufwa ya Saule ti Yonatani.

📖 Tangila bana : 2 Samuele 1 :1-4

1 Ntangu ntotila Saule kufwaka na bitumba yina ya bantu ya Israele nwanaka na bantu ya Filistia...

2 Na nima ya bilumbu zole, mwana-bakala mosi kwisaka ...me katuka na camp ya Saule, bilele ya kupasuka-pasuka, ntu ya kifuluka na putulu ya ntoto. Yandi kuma na Davidi, yandi fukama ilungi na ntoto.

3 Davidi yulaka yandi nde : « Nge me katuka wapi ? » Yandi tubaka nde : « Na camp ya bantu ya Israele, mono me kwisa kutina. »


4 Davidi nde : « Tela mono nki me bwa. » Yandi nde : « Basoda na beto me tina bitumba. Bantu na beto mingi me fwa-fwa. Saule mpi ti mwana na yandi Yonatani, bo me fwa bo. »

? Yula bana bakestio.

🏠 Bana sala bageste.

🗨 Bana yimba ti kina.

1.2 Davidi ti bantu yonso ya Israele dilaka lufwa ya Saule.

 **Tangila bana :** 2 Samuele 1 :11-12

11 Davidi simbaka bilele na yandi, yandi pasula-pasulaka yo. Bantu na yandi salaka kiteso mosi.


12 Bo vandaka na mafwa, bo dilaka, bo diaka ve tii kuna na nkokila sambu na Saule ti Yonatani ti bantu ya Israele, bantu ya Mfumu Nzambi, bayina kufwaka na bitumba.

? Yula bana bakestio.

 **Bana sala bageste.**

 **Bana yimba ti kina.**

1.3 Davidi yimbaka bandinga ya kitoko sambu na kubambuka Saule.

 **Tangila bana :** 2 Samuele 1 :17-27

17 Davidi yimbaka nkunga yai ya mawa sambu na Saule ti mwana na yandi Yonatani.

18 Yandi tubaka mpi nde bo longa yo na bantu yonso ya Yuda...:

19 Israele, bantotila na nge me fwa-fwa na zulu ya bangumba na nge, Basoda na nge ya ngolo mingi me bwa-bwa.

22 Na bitumba bunduki ya Yonatani vandaka kwisa kuvutuka ve mpamba, Mbele ya Saule mpi, yo vandaka kwisa kuvutuka ve kukonda kufwa bambeni.

23 Saule ti Yonatani, bo vandaka kuzolana mingi na luzingu na bo, Bo kabanaka mpi ve na ntangu ya lufwa na bo, Bo lutaka bakumbi-kumbi na ntinu, bo lutaka bantambu na ngolo.

24 Bankento ya Israele, beno dila Saule ! Yandi vandaka kulwatisa beno bilele ya kuluta mbwaki, bilele ya ntalu. Yandi vandaka kulwatisa beno bima ya kitoko ya wolo na zulu ya bilele na beno.

26 Mpangi na mono Yonatani, mono ke mona mawa mingi sambu na nge, Mono vandaka kuzola nge mingi mpenza !

Kuzola ya nge vandaka na yo, na mono yo vandaka ya kuyituka, Yo lutaka nkutu kuzola ya bankento.

? Yula bana bakestio.

 **Bana sala bageste.**


 **Bana yimba ti kina.**

>|< Kumanisa :

Na nima ya mbi yonso Saule salaka Davidi, ntangu yandi fwaka, Davidi vandaka ve kuyangalala. Yandi dilaka, ti yandi yimbaka bandinga ya kitoko na mafwa ya Saule.

Ata yandi zabaka nde yandi fweti yinga Saule na kimfumu, yandi vandaka ve na kiese kutuba nde, 'Mbote nge me fwaka. Ntangu yai, mono ta kuma mfumu.' Yandi na ntima yonso vandaka kupesa luzitu na Saule bonso Mfumu to Ntotila ya Nzambi me tula na zula na bo.

Kana muntu me sala beto mbi, yo kele mpasi kuvutula yandi mbote. Kansi Davidi salaka mpidina, ti yo pesaka Nzambi kiese.

 **Verse ya bubu yai :**

Kana muntu me sala beno mbi,/ beno vutula yandi mbi na mbi ve./ Kansi beno meka na kusala/ mambu yina kele ya mbote/ na meso ya bantu yonso. Roma 12 :17

 **Bankunga ya kwenda**

nzila mosi ti lesu :

Bana yimba nkunga mosi ya kwenda nzila mosi ti lesu yai.

 **Devoir sambu na bakristo :**

Keti muntu me sala nge mbi ? Yindula nki mambu ya mbote nge lenda sala sambu na yandi na mposi yai.

 **Kubinga bavidu na Yesu :**

Keti nge bakisa nde beto yonso, beto me sala Nzambi mbi? Nsiku na Yandi ya ntete kele nde beto zola Yandi na ntima na beto yonso. Ata

muntu mosi ve me sala yo. Mbala ya nkaka nge bakisa nde nge me sala bilumbu ya nge me yindula Yandi ve. Nge me sala mambu ya nge zabaka mbote pesaka Yandi kiese ve. Nge me bakisa nde nge kele nkwa-masumu.

Kana yai kele nge, kiese mingi. Kubakisa yo ke songa nde ntima na nge me yilama kuyamba Yesu Kristo. Bakisa nde Yesu kele Mwana-Nzambi ya me zinga mvu ya mvu ti Tata. Yandi me bika zulu, me kulumuka awa na nsi-ntoto sambu Yandi futa mfuka ya mbi yonso ya beto bantu me sala. Mfuka yina lombaka lufwa. Mfuka yina lombaka menga ya kitoko na Yandi. Yandi ndimaka na kufwa na zulu ya kulusi na sika na beto. Kansi lufwa vandaka na ngolo ve kusimba Yandi tii kuna. Yandi telamaka na lufwa. Bantu mingi monaka Yandi na moyo diaka. Na nima, Yandi vutukaka na zulu. Kisalu na Yandi na nsi-ntoto me mana. Menga na Yandi ta lunga kukatula mbi na nge. Yo ta lunga kuvutula nge na kinduku ti Nzambi. Keti nge ta tula Yandi ntima bubuyai ? Kaka binga zina na Yandi konso sika ya nge ikele. To, kana nge zola lusadisu na mambu yai, bikala na nima ya ecodim bubuyai ti beto ta sadisa nge.

Kana ntangu lunga,



Longa mikanda ya Bible :

(Bangindu kele na nsuka ya mukanda yai.)

==NSUKA YA LESO 1

Leso 1



***Kana muntu me sala beno mbi,
beno vutula yandi mbi na mbi ve.
Kansi beno meka na kusala
mambu yina kele ya mbote na
meso ya bantu yonso.***

Roma 12 :17

Leso 2 Davidi kumaka Ntotila ya Yuda.

2 Samuele 2

I. Preparasio ya Moniteur—

🎯 Kikuma ya lesa :

Bana ta zaba mbote nde Nzambi ta lungisa yonso ya Yandi me sila. Bo ta wa ndinga na Yandi ti tula yo ntima.

❤ Verse ya bubu yai :

« ...Mfumu Nzambi, / Nge keke Nzambi. / Nge ke salaka / mambu ya Nge ke tubaka /...

2 Samuele 7 :28

🗨 Bankunga ya kwenda nzila mosi ti lesa :

Nani keke Ngolo ? (Kwikama)

Nani ke kwikama ?
Nzambi ikeke kwikama
Kuluta bantu yonso.

Bi-bi-la !

Bii-bi-la !
Mukanda ya Nzambi!
Mono kwikila yonso na
Bii-ii-bi-la !

II. Revisio—

↑ Kuyindula diaka baleso me luta:

- Na lesa me luta, beto monaka nde Davidi dilaka lufwa ya nani ? (Saule ti mwana na yandi Yonatani)
- Sambu na nki yo vandaka mambu extra nde Davidi dilaka Saule ? (Sambu Saule sadilaka yandi kimbeni ya ngolo.)

III. Kulonga Lesa Yai—

⇒ Kuyantika :

Bambuka nde, dezia profete Samuele me tula Davidi mafuta na ntu. Yandi tubaka nde

Nzambi Davidi ta kuma nki ? (Mfumu to Ntotila)

Yo salamaka bamvula me luta, kansi Nzambi me vila ve nsilulu na Yandi. Nzambi lenda vila ve ndinga na Yandi. Yonso fweti lunga na mpila Yandi me tuba. Ntangu yai, Saule me fwaka. Israele keke na Mfumu diaka ve. Davidi me tina, me zinga bamvula mingi na nsi ya nkaka sambu Saule vandaka kuzomba yandi. Keti yandi fweti bikala kuna, to keti yandi lenda vutuka na ntoto na yandi ? Nki ta salama ntangu yai ?

🏠 **Developpement (Malongi ya nene ya lesa yai na banti ya malongi 3) :**

2.1 Davidi ti bantu na yandi kwendaka kuzinga na Ebroni (na ndambu ya sud) mpila Nzambi songaka yandi kusala.

📖 **Tangila bana :** 2 Samuele 2 :1-3

1 Ebuna na nima ya mambu yai, Davidi yulaka Mfumu Nzambi nde : « Keti mono lenda kwenda kukota na bwala mosi ya ntoto ya Yuda ? » Mfumu Nzambi nde : « E, kwenda. » Davidi nde : « Nki bwala ? » Yandi nde : « Na bwala Ebroni. »

2 Yo yina, Davidi kwendaka na Ebroni ti bankento na yandi yai zole Ahinoami... ti Abigaile, yina vandaka ntete nkento ya Nabale.

3 Yandi bakaka mpi bantu na yandi ti bafami na bo. Bo kwendaka kutunga penepene na Ebroni.

❓ **Yula bana bakestio.**

🏠 **Bana sala bageste.**

🗨 **Bana yimba ti kina.**


2.2 Bantu ya Yuda, dikanda na ndambu ya sud ya Israele, bo kwisaka na Ebroni. Bo tulaka Davidi mfumu na zulu na bo.

 **Tangila bana** : 2 Samuele 2 :4

4 Bantu ya Yuda kwisaka na Ebroni. Bo tulaka Davidi mafuta, ebuna yandi kumaka ntotila ya Yuda...

- ? Yula bana bakestio.**
- 🏠 Bana sala bageste.**
- 👂 Bana yimba ti kina.**

2.3 Mwana ya Saule kumaka mfumu na ndambu ya nord, kansi Yuda landaka Davidi bamvula 7 ti demi.

 **Tangila bana** : 2 Samuele 2 :8-11

8 Na ntangu yina Abnere, mfumu ya basoda ya Saule, vandaka me baka Yishebosheti, mwana ya Saule...

9 ...yandi tulaka yandi mfumu ... ya Israele....(na ndambu ya norde)

10-11 Yishebosheti ...vandaka ntotila bamvula zole. Kansi dikanda ya Yuda kangamaka na Davidi. Yandi yalaka bo na bwala Ebroni bamvula nsambwadi ti ndambu.

- ? Yula bana bakestio.**
- 🏠 Bana sala bageste.**
- 👂 Bana yimba ti kina.**

➤|< Kumanisa :

Nzambi silaka ntama nde Davidi ta kuma mfumu. Ntangu yai, luyalu na yandi me yantika. Yandi me kuma mfumu ya sud parti ya Israele. Ntangu ta lunga nde yandi ta kuma mpi mfumu na zulu ya Israele ya mvimba. Kana Nzambi me tuba, yo fweti salama !

♥ Verse ya bubu yai :

« ...Mfumu Nzambi,/ Nqe kele Nzambi./ Nqe ke salaka/ mambu ya Nqe ke tubaka/...
2 Samuele 7 :28

[Bana tuba yo ndambu-ndambu na nima ya nge. Na nima, bo meka kutula yo ton ti ritime. Bo yimba yo mbala tatu to kuluta.]

👂 Bankunga ya kwenda nzila mosi ti lesu :

Bana yimba nkunga mosi ya nkaka ya ke kwenda nzila mosi ti lesu yai.

👉 Devoir sambu na bakristo :

Ndinga ya Nzambi kele ya kieleka. Keti nge ke wa yo lumbu na lumbu? Beno bakristo, devoir mono ke pesa beno na mposo yai kele kutanga to kuwa ndambu ya Ndinga ya Nzambi konso lumbu. Ebuna tula ngolo kulemfuka na yo.

✝ Kubinga bavidu na Yesu :

Beno ya me tula ntima na Yesu ntete ve, zaba nde Ndinga ya Nzambi kele ya kieleka. Nzambi me sila nde, *“Muntu yina me ndima Mwana-Nzambi na ntima na yandi, yandi ke na ndola ve. Kansi, muntu yina me ndima Yandi ve, yandi me baka ndola na yandi dezia...”*(Yoane 3:18).

Beto kele na makambu ti Nzambi sambu na masumu na beto. Yesu fwaka sambu na kubaka ndola na beto. Kana beto ndima yo ve, beto fweti baka ndola na yo beto mosi. O, kwisa na Yesu bubuyai. Yandi ta lolula nge ti kitula nge mwana na Yandi. Yandi ta pesa nge ngolo kukuma mulonguki na Yandi ti kulanda Yandi tii kuna.

Kana ntangu lunga,

📖 Longa mikanda ya Bible :

(Bangindu kele na nsuka ya mukanda yai.

==NSUKA YA LESO 2

Leso 2



***« ...Mfumu Nzambi, Nge
kele Nzambi. Nge ke
salaka mambu ya Nge ke
tubaka...***

2 Samuele 7 :28

Leso 3 Davidi kumaka Ntotila ya Israele ya mvimba.

2 Samuele 3, 5

I. Preparasio ya Moniteur—

🎯 Kikuma ya lesa :

Kiteso mosi bonso mposo me luta :

Bana ta zaba mbote nde Nzambi ta lungisa yonso ya Yandi me sila. Bo ta wa ndinga na Yandi ti tula yo ntima.

♥ Verse ya bubu yai :

Beto revise verse ya mposo me luta--
« ...*Mfumu Nzambi, / Nqe keke Nzambi, / Nqe ke salaka / mambu ya Nqe ke tubaka...*
2 Samuele 7 :28

👤 Bankunga ya kwenda nzila mosi ti lesa :

Nani Kele Ngolo ? (Kwikama)

Nani ke kwikama ?
Nzambi ikele kwikama
Kuluta bantu yonso.

Bi-bi-la !

Bii-bi-la !
Mukanda ya Nzambi !
Mono kwikila yonso na
Bii-ii-bi-la !

II. Revisio—

• Kuyindula diaka baleso me luta :

Beto me mona nde Nzambi me yantika kulungisa nsilulu na Yandi na Davidi nde yandi fweti kuma mfumu.

- Davidi me kuma mfumu na zulu ya dikanda mosi ya Israele. Nki zina na yo? (Yuda)
Yuda vandaka wapi—na norde parti to na sude parti ya ntoto ya Israele? (Na sude parti)

Beto me mona nde muntu zina ya Yeshibosheti kumaka mfumu na norde parti ya ntoto ya Israele. Kansi yandi yalaka kaka bamvula zole. Davidi vandaka na bwala Ebroni na ndambu ya sude, sika Nzambi songaka yandi kukwenda.

III. Kulonga Leso Yai—

➡ Kuyantika :

- Nani ke bambuka bamvula ikwa Davidi yalaka na Ebroni ?
(Bamvula 7 ti demi)

Nki nge banza Davidi vandaka kuyindula na bamvula yina ? Keti na nsi ya ntima yandi tubaka nde, « Nzambi me tuba nde mono ta vanda mfumu. Mono me kinga mingi. Keti mono ta vanda mfumu ya kaka dikanda mosi ? Beto zaba ve nki Davidi yindulaka, kansi yo ke monika nde yandi kaka tulaka ntima na Nzambi nde Yandi ta lungisa nsilulu na Yandi na ntangu na Yandi.

🏠 Developpement (Malongi ya nene ya lesa yai na banti ya malongi 3) :

3.1 Bitumba ya nda salamaka na kati ya nzo ya Davidi ti ya Saule, ti Davidi butaka bana na Ebroni.

📖 Tangila bana : 2 Samuele 3 :1-5

1 Bitumba vandaka bilumbu mingi ti dikanda ya Saule ti dikanda ya Davidi. Davidi kumaka ngolo mingi, kansi dikanda ya Saule vandaka kaka kulemba.


2-5 Bana yina ya Davidi butaka na bwala Ebroni bo yai : mwana na yandi ya ntete Aminoni...ya zole Kileabi, ...ya tatu Absalomi...ya iya Adonia...ya tanu Shefatia...ya sambanu Yitreami...Bana yai yonso butukaka ntangu Davidi vandaka na bwala Ebroni.

❓ Yula bana bakestio.

🏠 Bana sala bageste.

 **Bana yimba ti kina.**

3.2 Na nsuka ya mvita yina, Davidi nungaka, ti bantu yonso ya Israele tulaka yandi mfumu.

 **Tangila bana :** 2 Samuele 5 :1-5

1 Ntangu yai, bantu yonso ya Israele kwisaka na bwala Ebroni. Bo tubilaka Davidi nde : « Beto keke bampangi na nge ya menga mosi.

2 Ntete ntangu Saule vandaka ntotila na beto yonso, nge muntu vandaka kunata basoda ya Israele na bitumba. Ebuna Mfumu Nzambi tubaka na nge nde : 'Nge muntu ta talaka ti kuyala bantu ya Israele, bantu na Mono. ' »

3 Mpidina bambuta yonso ya Israele kwisaka kukuta Ntotila Davidi na Ebroni. Yandi wakanaka na bo na meso ya Mfumu Nzambi. Bo tulaka yandi ntotila ya Israele.


4-5 Davidi vandaka bamvula 30 ntangu yandi kumaka ntotila. Yandi yalaka bamvula 40...--na bwala Ebroni bamvula nsambwadi ti ndambu ... ti ...na bwala Yeruzalemi bamvula 33.

? Yula bana bakestio.

 **Bana sala bageste.**

 **Bana yimba ti kina.**

3.3 Davidi nwanaka ti bantu ya Yebusi ti bakaka bwala na bo, yandi kumisaka yo Yeruzalemi, kiti ya kimfumu ya Davidi.

 **Tangila bana :** 2 Samuele 5 :6, 9-10, 12

6 Ntotila Davidi ti bantu na yandi kwendaka kunwanisa bwala Yeruzalemi. Bantu ya dikanda ya Yebusi vandaka kuzinga kuna...

9 Ntotila Davidi yantikaka kuzinga na banzo ... ya ngolo. Yandi pesaka yo zina Bwala ya

Davidi. Yandi ziungisaka yo lupangu ya ngolo....

10 Davidi vandaka kukuma kaka ngolo sambu Mfumu Nzambi, Nzambi Mpungu, vandaka ti yandi.

12 Yo yina, Davidi zabaka nde Mfumu Nzambi Muntu me tulaka yandi ntotila ya bantu ya Israele. Yandi mpi me kumisa kimfumu na yandi ngolo ti lukumu...


? Yula bana bakestio.

 **Bana sala bageste.**

 **Bana yimba ti kina.**

>|< Kumanisa :

Davidi kangaka ntima, ebuna yonso ya Nzambi silaka yandi, yo salamaka. Yonso ya Nzambi me sila beto na ndinga na Yandi, yo fweti lungisama. Beto kuwa ndinga na Yandi mbote ti mingi. Beto tula yo ntima.

 **Verse ya bubu yai :**

Beto revise verse ya mposo me luta--
« ...Mfumu Nzambi, / Nge keke Nzambi, / Nge ke salaka/ mambu ya Nge ke tubaka...
2 Samuele 7 :28

[Yimba verse yina diaka. Pesa ntangu nde ndambu ya bana lenda tuba yo mosi-mosi. Bana ya nkaka kuwa ti zuze kana yandi me tuba yo mbote.]

 **Bankunga ya kwenda nzila mosi ti lesu :**

Bana yimba mosi ya bankunga ya kwenda nzila mosi ti lesu yai.

 **Devoir sambu na bakristo :**

Beto landa na devoir kiteso mosi bonso mposo me luta. Bana tanga to kuwa ndinga ya Nzambi konso lumbu. Bo meka kusala yina ya bo ke wa.

 **Kubinga bavidu na Yesu :**

Nsilulu ya beto bakwidi keke moyo ya mvula na mvula, kintwadi ti Nzambi na bwala na Yandi.

Kansi nsilulu ya nkaka mpi kele sambu na bantu ya yamba Yesu Kristo, Mwana ya Nzambi, ve. Na Kusonga 20 :15 beto tanga nde, “Konso muntu yina ya bo sonikaka zina na yandi na mukanda ya moyo ve, bo losaka yandi na dizanga ya tiya. Yai kele kisika Nzambi salaka sambu na Satana ti bawanzio na yandi. Kansi mawa mingi! Bo ta buya kulanda Yesu, bo mpi ta kwenda kuna.

Keti nge zaba mbote nde zina na nge kele na mukanda ya moyo ya Nzambi ? O, ndima Yesu Kristo bubuyai kana nge me sala yo ntete ve. Balula ntima ti tula kivuvu na Yandi. Yandi me pesa menga na Yandi ya ntalu sambu na nge. Yandi me telama na lufwa. Yandi ta gulusa nge kana nge ta binga zina na Yandi na ntima na nge yonso.

Kana ntangu lunga,



Longa mikanda ya Bible :

(Bangindu kele na nsuka ya mukanda yai.)

==NSUKA YA LESO 3

Leso 3



***« ...Mfumu
Nzambi,
Nge kele
Nzambi.
Nge ke
salaka***

mambu ya Nge ke tubaka...

2 Samuele 7 :28

Leso 4 Davidi vutulaka Sanduku ya Nzambi na Yeruzalemi na yangalala ti kukina.

2 Samuele 6, 1 Bansangu 12, 15, 16 (Tala mpi Kubasika 25 :13-14, Kutanga 7 :9)

Leso na Nkufi : Davidi zolaka kusala mambu ya mbote kunata Sanduku ya Kuwakana ya Nzambi na Yeruzalemi sambu bo yantika kusosa Nzambi diaka. Kansi bo salaka yo ve na mpila Nzambi songaka bo. Yo yina, muntu kufwaka. Davidi vandaka na makasi na Nzambi. Yandi bikisaka Sanduku na nzo ya bantu ya nkaka. Ntangu yandi monaka nde Nzambi sakumunaka bo, yandi bakaka ngolo diaka. Yandi nataka Sanduku na Yeruzalemi na mpila Nzambi songaka bo. Bantu vandaka na kiese mingi.

I. Preparasio ya Moniteur—

🎯 Kikuma ya lesu :

Bana ta landa bansiku ya Nzambi, sambu bo ta bakisa nde yonso kele sambu na kukeba beto na mambote ti sambu na lukumu na Yandi.

❤ Verse ya bubu yai :

Kiese na bayina/ ke landaka mambu na Yandi./
...Bo ke landaka/ kaka nzila na Yandi./
Bankunga 119 :2-3

👂 Bankunga ya kwenda nzila mosi ti lesu :

Bansiku Kumi Kulanda

Nzambi kupesaka
 Bansiku kumi (3x)
 Ya beto fweti kulanda.

BI-BI-LA !

Bii-bi-la ! Mukanda kitoko
 Mo' zola mingi kuwa yo, Bii-bi-la !

II. Revisio—

👉 Kuyindula diaka baleso me luta:

Beto me mona nde Nzambi tubaka nde Davidi fweti kuma ntotila ya Israele na nima ya Saule. Beto me mona nde Saule fwaka na bitumba lumbu mosi ti mwana na yandi Yonatani. Davidi dilaka bo ngolo.

Na nima, yandi yulaka Nzambi nde yandi kwenda kuzinga wapi. Nzambi tubaka nde 'bwala Ebroni.' Kuna, bo tulaka Davidi ntotila na zulu ya dikanda mosi ya Israele—dikanda ya Yuda.

Na nima ya ntangu, bambuta ya Israele lombaka yandi kuvanda ntotila ya bantu yonso ti makanda yonso. Yandi kwendaka kuzinga ya bwala Yeruzalemi. Ntangu yai, Davidi kele Ntotila to Mfumu ya kuyala Israele ya mvimba.

III. Kulonga Leso Yai—

🎯 Kuyantika :

Keti nge me mona bansiku ya nkaka ya Nzambi pesaka, ebuna nge me kudyula, « Sambu na nki Nzambi tulaka yai nsiku ? » to « Sambu na nki Nzambi tubaka nde beto fweti sala kaka mutindu yai ? »

Bubu yai beto ta yindula nsiku mosi Nzambi pesaka bantu na Yandi, nsiku ya monikaka fioti ti mfunu ve. Beto ta mona mpi nki salamaka ntangu bo landaka yo ve.

🌟 Developpement (Malongi ya nene ya lesu yai na banti ya malongi 5) :

4.1 Davidi solulaka ti bambuta ya Israele lukanu kunata Sanduku ya Kuwakana ya Nzambi na Yeruzalemi, sambu bo yantika kusosa Nzambi diaka.

📖 Tangila bana : 1 Bansangu 13 :1-4

1-2 Davidi...tubaka na bantu yonso ya Israele nde : « Kana beno me zola, kana Mfumu Nzambi mpi me ndima, beto tindeno nswalu ndinga na bampangi na beto na ntoto yonso ya Israele, ti na banganga-Nzambi... Beto binga bo na kwisa kuvukana ti beto.

3 Ebuna beto ta zaba kwenda kubaka Sanduku ya Kuwakana ya Nzambi na beto... »

4 Bantu yonso monaka nde mambu ya ntotila Davidi me tuba kele mbote. Bo ndimaka.

? Yula bana bakestio.

🏠 Bana sala bageste.

🗨️ Bana yimba ti kina.

4.2 Kansi, bo landaka mabanza na bo mosi nki mutindu kunata yo. Bo landaka ve nsiku ya Nzambi nki mutindu kunata yo.

📖 **Tangila bana** : Kubasika 25 :12-14, Kutanga 7 :9, 1 Bansangu 13 :5-8

Mpila Nzambi songaka bo kunata Sanduku : (Ntangu bo vandaka kutunga Sanduku) Kubasika 25 :13-14 *Bo sala banti ... sambu na kunataka sanduku.*

Kutanga 7 :9 ...*kisalu na bo vandaka kutalaka bima ya nsiku na bo fweti nata na zulu ya mapeka.*

Mpila bo nataka yo : 1 Bansangu 13 :7-8

7 ...*Bo katulaka yo, bo tulaka yo na zulu ya pusupusu ya mpa, ebuna Uza ti Ahio bantu vandaka kunata pusupusu.*

8 *Davidi ti bantu yonso ya Israele vandaka kwenda kukina ti kuyimba bankunga na kiese yonso na kupesa Mfumu Nzambi lukumu. Bo vandaka kubula bima ya miziki ya mutindu na mutindu...*

? Yula bana bakestio.

🏠 Bana sala bageste.

🗨️ Bana yimba ti kina.

4.3 Aksida salamaka, ebuna Uzza simbaka Sanduku, ya Nzambi me songa bo nde bo simba ve. Yo yina, Nzambi pesaka yandi ndola ya lufwa.

📖 **Tangila bana** : 1 Bansangu 13 :9-10.

9 ...*Uza tandulaka diboko na yandi. Yandi simbaka Sanduku ya Kuwakana sambu bangombe zolaka kubwisa yo na ntoto.*

10 *Mfumu Nzambi wilaka Uza makasi. Yandi pesaka yandi ndola sambu yandi simbaka Saunduku ya Kuwakana. Uza kufwaka kisika yina na meso ya Mfumu Nzambi.*

? Yula bana bakestio.

4.4 Davidi vandaka na makasi na Nzambi. Dekurazema simbaka yandi. Yo yina, yandi nataka Sanduku na nzo ya muntu mosi penepene. Yandi bikisaka yo kuna.

📖 **Tangila bana** : 1 Bansangu 13 :11-13

11 ...*Davidi waka makasi sambu Mfumu Nzambi fwaka Uza mpidina.*

12 *Kilumbu yango yina, Davidi tinaka Nzambi boma, yandi tubaka nde : « Ebuna, nki mutindu mono lenda nata Sanduku ya Kuwakana ? »*

13 *Yo yina, yandi buyaka na kunata Sanduku ya Kuwakana na Yeruzalemi. Yandi songaka bantu na kwenda kutula yo na nzo ya ...muntu ya bwala ya Gati.*

? Yula bana bakestio.

🏠 Bana sala bageste.

🗨️ Bana yimba ti kina.

4.5 Davidi monaka nde Nzambi sakumunaka muntu yina. Yo yina yandi bakaka kikesa diaka. Yandi nataka Sanduku na Yeruzalemi na mpila Nzambi songaka yandi. Bantu vandaka kuyangalala

📖 **Tangila bana** : . 1 Bansangu 15 :1-4, 12-16, 28, 29

1-2 *Davidi ... tubaka nde : « Kaka bantu ya dikanda ya Levi bantu ke na nswa ya kunataka Sanduku ya Kuwakana, sambu bo bantu ya Mfumu Nzambi solaka kimakulu na kunataka yo ti kutalaka yo. »*

3 *Yandi bingaka bantu yonso ya Israele na kwisa na Yeruzalemi sambu na kunata Sanduku ya Kuwakana na kisika ya yandi yidikilaka yo.*

4 *Yandi bingaka mpi banganga-Nzambi bana ya Aroni ti bantu ya dikanda ya Levi.*

12 *Yandi tubaka na bo nde : « Beno ... nata yo na kisika yai ya mono yidikilaka yo.*

13 *Mbala ya ntete, beno vandaka ve sambu na kunata yo, yo yina Mfumu Nzambi, Nzambi na beto, pesaka beto ndola ya*

lufwa sambu beto landaka ve bansiku na Yandi.

14-15 Ntangu yai...Bantu ya Levi tulaka yo na zulu ya mapeka, mutindu vandaka bansiku ya Mfumu Nzambi pesaka na Moize.

16 Davidi songaka bambuta ya dikanda ya Levi ...kuyimba bankunga ti kubula bima ya miziki ya mutindu na mutindu sambu na kusonga kiese.

28-29 Bantu yonso ya Israele kwendaka nzila mosi na bantu yina... Bo vandaka kwenda ke tula milolo ya kiese ti kubula bima...ya misiki...Ntotila Davidi ke kwisa kupumbuka na kiese ti kukina...

? Yula bana bakestio.

🏠 Bana sala bageste.

👂 Bana yimba ti kina.

➤|◀ Kumanisa :

Davidi ti bantu ya Israele, bo zolaka kusala mambu ya mbote—kunata Sanduku ya Nzambi na Yeruzalemi sambu bo sadila yo diaka na kusamba Nzambi.

Kansi bo landaka ve bansiku ya Nzambi me pesa bo sambu na kima yina ya santu. Bo salaka kaka na mabanza ya bo mosi. Yo yina, mpasi ya nene kwisaka na bo, tii ntangu ya bo vutukaka na ndinga ya Nzambi. Ntangu yina, bo nataka yo mbote ti na kiese yonso.

Mbala ya nkaka beto bakisa ve sambu na nki Nzambi me tula konso nsiku ya Yandi. Kansi Yandi kele na raison ya mbote, ata beto bakisa yo ve. Ndinga yonso ya Nzambi, yo kele sambu na mambote na beto, mpi sambu na lukumu na Yandi. Kana beto landa yo, luzingu na beto ta vanda na kiese ya kuluta.

♥ Verse ya bubu yai :

Kiese na bayina/ ke landaka mambu na Yandi./
....Bo ke landaka/ kaka nzila na Yandi.
Bankunga 119 :2-3

👂 Bankunga ya kwenda nzila mosi ti lesu :

Bana yimba mosi ya bankunga ya ke kwenda nzila mosi ti lesu yai.

👋 Devoir sambu na bakristo :

Beno bakristo, nki mutindu beno ta zaba nki Nzambi ke zola ? Kaka kana beno kele kutanga to kuwa malongi na Yandi mingi. Devoir mono ke pesa beno mposo yai, yo yai : Kusala mambu mosi na mpila nde nge kuwa ndinga ya Nzambi ya kuluta. Na mposo ke kwisa, mono ta yula nge nki ya mpa nge salaka.

✝ Kubinga bavidi na Yesu :

Kana nge meka kulanda bansiku ya Nzambi, nge ta mona nswalu nde nge ke lunga ve. Beto yonso kele bankwa-masumu. Beto kele na mfunu ya Yesu kugulusa beto. Yandi kele Mwana-Nzambi me kulumuka na zulu, me kwisa sambu na kufwa na zulu ya kulunsi na sika na beto. Yandi kele Mfumu ya me telama na lufwa. Yandi lenda gulusa nge, ti Yandi lenda kitula nge mulandi ya kieleka na Yandi. Keti nge zola Yandi kusala yo sambu na nge ? Binga Yandi. Songa Yandi mpidina. Kana nge zola beto kusamba ti nge na mambu yina, kaka bikala na nima ya ecodim.


Kana ntangu lunga,

📖 Longa mikanda ya Bible :

(Bangindu kele na nsuka ya mukanda yai.)

==NSUKA YA LESO 4

Leso 4



***Kiese na bayina ke
landaka mambu na
Yandi.***

***....Bo ke landaka kaka
nzila na Yandi.***

Bankunga 119 :2-3

Leso 5 Davidi zolaka kutunga Tempelo, kansi Nzambi vandaka na lukanu ya nkaka.

2 Samuele 7, 1 Bansangu 17,22

I. Preparadio ya Moniteur—

🎯 Kikuma ya lesa :

Bana ta sosa ti landa lukanu ya Nzambi sambu na luzingu na bo, sambu bo ta zaba nde lukanu na Yandi kele mbote, kansi lukanu na beto mosi ke konda.

♥ Verse ya bubu yai :

*Nge kele Nzambi na mono./
Longa mono na kusala/konso kima ya Nge zola.
Mpeve na Nge kuvandila mono mbote/ ti kunata
mono na nzila ya mbote./ Bankunga 143 :10*

🗨️ Bankunga ya kwenda nzila mosi ti lesa :

Ee, Mfumu, Ee
Ee, Mfumu, ee
Na yonso ya Nge tuba
Ee, Mfumu, ee
Mono zola lemfuka

Mvutu :

Bu mo' tanga Bibila
Mono kaka ta ndima
Ye mono ta tuba ee,
Mfumu, ee !

II. Revisio—

• Kuyindula diaka baleso me luta:

Na mposo me luta, beto monaka nde Mfumu Davidi nataka kima mosi ya mfunu na kapital, Yeruzalemi. Yandi nataka nki ?
(Sanduku ya Kuwakana ya Nzambi)

III. Kulonga Leso Yai—

⇒ Kuyantika :

Ntangu yai, Sanduku sika Nzambi songaka lukumu na Yandi, yo me kuma na Yeruzalemi. Davidi yidikaka ntenta ya mbote sambu na yo. Kansi nzo ya mbote kibeni, yo vandaka ve. Davidi talaka nzo na yandi ya kitoko. Na nima

yandi talaka nzo ya ntenta ya Sanduku ya Nzambi. Yandi bakaka lukanu na ntima na yandi, ti yo monikaka mbote.

🌟 **Developpement (Malongi ya nene ya lesa yai na banti ya malongi 4) :**

5.1 Davidi songaka lukanu na yandi na kutunga Nzo-Nzambi na profete Natani, ye Natani ndimaka yo nswalu.

📖 **Tangila bana :** 2 Samuele 7 :2-3

2 Kilumbu mosi, Davidi tubaka na profete Natani nde : « Tala, mono ke zinga mbote na nzo yai ya kutunga na mabaya ya sedre, kansi Sanduku ya Kuwakana ya Mfumu Nzambi ke bikala na nzo ya ntenta. Nki ngindu na nge ? »

3 Natani tubaka nde : « Sala yina ya nge me zola, sambu Mfumu Nzambi kele ti nge. »

? Yula bana bakestio.

🗨️ Bana sala bageste.

🗨️ Bana yimba ti kina.

5.2 Kansi mpimpa yina, Nzambi songaka Natani nde kutunga Nzo-Nzambi, yo vandaka ve lukanu na Yandi sambu na Davidi, kansi lukanu na Yandi vandaka nde mwana ya Davidi tunga yo.

📖 **Tangila bana :** 1 Bansangu 17 :3-4, 11-12 (NB : 2 Samuele diaka ve, kansi 1 Bansangu)

3 Kansi na mpimpa, Mfumu Nzambi tubaka na Natani nde :

4 Kwenda kutubila muntu na Mono Davidi nde Mono Mfumu Nzambi me tuba nde : 'Nge ve muntu ta tungila Mono nzo ya Mono fweti zingaka.

11-12 ...mwana na nge mosi...Yandi muntu ta tungila Mono nzo.


? Yula bana bakestio.

🗨️ Bana sala bageste.

🗨️ Bana yimba ti kina.

5.3 Davidi ta tungila Nzambi nzo ve, kansi


Nzambi ta tungila yandi nzo (dikanda) to kimfumu ya ta suka ve. Yai ta vanda kimfumu ya Mesia.

 **Tangila bana :** 1 Bansangu 17 :10, 14

10 « ...Mono ke songa nge nde mono Mfumu Nambi, Mono ta pesa nge dikanda ya bantu.... (na français « Et je t'annonce que l'Eternel te bâtira une maison. »—Mono ke songa nge nde Mono Nzambi ta tungila nge nzo. Nzo yina kele dikanda ya bantu.)

14 Mono ta sala na mpila nde yandi vandaka kaka ntotila ya bantu na mono tii kuna. Kimfumu ya fami na yandi kusuka ve. »

5.4 Davidi ndimaka lukanu ya Nzambi sambu na yandi. Yandi yidikaka bima sambu na kusadisa mwana na yandi kutunga Nzo-Nzambi na nima ya lufwa na yandi.

 **Tangila bana :** 1 Bansangu 17 :16-24, 22 :1-5

16 Ebuna Ntotila Davidi kwendaka kukota na Nzo-Nzambi ya ntenta. Yandi sambaka Nzambi nde : « Mfumu Nzambi...mono nani, fami na mono kele banani, yo yina Nge me kumisa mono na kisika yai ya mono kele ?

20 Mfumu, ya kieleka, muntu ya nkaka kele ve bonso Nge. Nzambi ya nkaka kele ve bonso Nge. Nzambi ya nkaka mpi kele ve bonso Nge...

23-24 « Ntangu yai Mfumu Nzambi, lungisa mambu ya Nge tubaka sambu na mono ti fami na mono. Sala yo konso ntangu mutindu Nge tubaka...ebuna zina na Nge ta vandaka lukumu tii kuna... »

22 :1 Yo yina, yandi tubaka nde : « Yai kele kisika ta vandaka nzo ya Mfumu Nzambi....

2 Davidi bingaka banzenza yonso ...Yandi pesaka bankaka na kati na bo kisalu ya kupasula matadi sambu na kutunga Nzo-Nzambi.

3-4 Davidi yidikaka bibende mingi sambu na kusala banonso ti mabaya mingi ya sedre...

5 Davidi yindulaka nde : « Nzo-Nzambi ya mwana na mono Salomo ta tunga, yo fweti vanda ya kitoko mpenza ti ya lukumu ...Yo yina, yandi sosaka bima mingi ntangu yandi me fwa ntete ve.»

? Yula bana bakestio.

👤 Bana sala bageste.

👤 Bana yimba ti kina.

»|« Kumanisa :

Nzambi kele na lukanu sambu na bana na Yandi. Mambu mingi beto lenda sala na luzingu na beto. Yo kele na zina na beto na zulu na yo. Nzambi zola beto kusala yo.

Ya nkaka kele mpi mbote, kansi zina ya muntu ya nkaka kele na zulu na yo. Mbote beto sosa kuzaba nki Nzambi zola beto kusala. Beto landa yo. Kansi beto kele na nswa mpi kusadisa na baprojet ya bantu ya nkaka ke salaka.

♥ Verse ya bubu yai :

Nge kele Nzambi na mono./

Lonqa mono na kusala/ konso kima ya Nge zola. Mpeve na Nge kuvandila mono mbote/ ti kunata mono na nzila ya mbote./

Bankunga 143 :10

[Kabisa bana na bandambu 4, konso ndambu tuba fraze mosi. Na nima, bana yonso tuba yo.]

👤 Bankunga ya kwenda nzila mosi ti leso :

Bana yimba nkunga mosi ya kwenda nzila mosi ti leso yai. ('Ee, Mfumu, Ee' to nkunga ya nkaka)

👤 Devoir sambu na bakristo :

Devoir mono ke pesa beno bakwikidi kele kusonga Nzambi nde nge zola landa lukanu na Yandi na mambu yonso.

✝ Kubinga bavidu na Yesu :

Kana nge me balula ntima ntete ve na Yesu, lukanu ya ntete ya Nzambi kele nde nge kwisa na Yandi, nge ndima Yandi Yesu Kristo bonso Mvulusi ti Mfumu na nge. Yandi zola ve nde ata muntu mosi kuvila. Yandi kwisaka awa na

nsi-ntoto kugulusa nge. Kwisa bikala na nima ya ecodim kana nge kele na kestio na mambu yai, to kana nge zola beto kusamba ti nge.

Kana ntangu lunga,




Longa mikanda ya Bible :

(Bangindu kele na nsuka ya mukanda yai.)

==NSUKA YA LESO 5

Leso 5



Nge kele Nzambi na mono.

***Longa mono na kusala konso kima
ya Nge zola.***

***Mpeve na Nge kuvandila mono
mbote ti kunata mono na nzila ya
mbote.***

Bankunga 143 :10

Leso 6 Davidi wilaka Mefibosheti mawa.

2 Samuele 9

I. Preparasio ya Moniteur—

🎯 Kikuma ya lesa :

Bana ta baka bantu ya kele na kifu na nitu bonso bantu ya nkaka.

❤ Verse ya bubu yai :

Kufinga ve muntu ya kufwa-makutu./ Kutula ve sakuba na nzila/ ke kwisa muntu ya kufwa-meso,/ kansi zitisa Mono. Mono kele Mfumu Nzambi./ Levi 19 :14

🗣 Bankunga ya kwenda nzila mosi ti lesa :

Yesu Zola Bana Yonso

II. Revisio—

† Kuyindula diaka baleso me luta :

- Davidi zolaka kutunga nki ? (Nzo-Nzambi to Tempelo)
- Nzambi songaka mutubi na Yandi kusonga Davidi nde yina vandaka ve lukanu ya Nzambi sambu na yandi. Keti Davidi ndimaka to buyaka ? (Yandi ndimaka lukanu ya Nzambi.)
- Nzambi tubaka nde mwana na yandi Salomo muntu fweti tunga yo. Kansi Davidi salaka nki sambu na kusadisa ? (Yandi yidikaka bima mingi sambu na yo, bonso matadi, bibende, ti mabaya.)

III. Kulonga Leso Yai—

⇒ Kuyantika :

Bamvula lutaka ,ti Nzambi sadisaka Mfumu Davidi mingi. Yandi bedisaka bambeni mingi ya Israele. Mbala ya nkaka beno bambuka nde na bilumbu na ntwala yandi kumaka Mfumu, yandi silaka nduku na yandi Yonatani kusala yandi mbote ntangu yonso. Davidi vilaka ve nsilulu na yandi.

🏠 Developpement (Malongi ya nene ya lesa yai na banti ya malongi 4) :

6.1 Nduku ya Davidi Yonatani me fwaka ntama, kansi yandi sosaka kana muntu me bikala ya fami na yandi, sambu yandi sala yandi mbote.

📖 **Tangila bana** : 2 Samuele 9 :1-3a

1-3a Kilumbu mosi, Ntotila Davidi yulaka nde : « Keti ke na muntu ya nkaka me bikala na fami ya Saule ? Sambu mono zola sala yandi mbote sambu na Yonatani....mutindu mono silaka na meso ya Nzambi ? »

? Yula bana bakestio.

🙏 Bana sala bageste.

🗣 Bana yimba ti kina.

6.2 Sielo Siba songaka yandi nde muntu mosi me bikala ya fami ya Yonatani—Mefibosheti, muntu ya makulu zole ya kifu.

📖 **Tangila bana** : 2 Samuele 9 :3b

3b Siba tubaka nde : »E, mwana mosi ya Yonatani kele tii bubu. Yandi kele makulu-kifu. »

? Yula bana bakestio.

🙏 Bana sala bageste.

🗣 Bana yimba ti kina.

6.3 Davidi bingaka Mefibosheti kukwisa, ti Mefibosheti pesaka yandi luzitu.

📖 **Tangila bana** : 2 Samuele 9 :5-6

5 Ebuna Ntotila Davidi tindaka Siba...na kusosa mwana yango yina.


6 Ntangu Mefibosheti mwana ya Yonatani...kwisaka kukuma, yandi fukamaka na ntwala ya Ntotila Davidi ilungi na ntoto. Davidi nde : « Mefibosheti. » Yandi nde : « E, Mfumu. »

? Yula bana bakestio.

🙏 Bana sala bageste.

🗣 Bana yimba ti kina.

6.4 Davidi wilaka Mefibosheti mawa kiteso mosi bonso yandi vandaka kutambula mbote, bonso konso muntu ya nkaka, sambu yandi vandaka mwana ya Yonatani.

 **Tangila bana :** 2 Samuele 9 :7-13

7 Davidi tubilaka yandi nde : « Kumona boma ve, mono ke zola kusala nge mbote sambu na tata na nge Yonatani. Mono ta vutudila nge ntoto yonso ya nkaka na nge Saule, ebuna nge ta diaka na mesa na mono ntangu yonso. »

8 Mefibosheti fukamaka diaka ti kutuba nde : « Mbwa ya kufwa bonso mono, mono nani nge mfumu na kutala mono ? »

11...Yo yina, Mefibosheti vandaka kudia na mesa ya Ntotila Davidi, bonso nde yandi kele mwana na yandi.

13 Mpidina, Mefibosheti vandaka kuzinga na bwala Yeruzalemi, sambu yandi vandaka kudia bilumbu yonso na mesa ya ntotila. Mefibosheti vandaka kutambula makulu yonso zole kifu.

? Yula bana bakestio.

🏠 Bana sala bageste.

👂 Bana yimba ti kina.

»|« Kumanisa :

Mambu ya nene na mabanza ya Davidi vandaka nde Mefibosheti vandaka mwana ya Yonatani. Yandi talaka ve nde yandi vandaka makulu ya kufwa. Mfumu Davidi bakaka yandi bonso yandi muntu ya nitu kitoko yonso. Beto mpi, mbote beto sala mbote na bantu ya kele na nitu ya kifu.

♥ Verse ya bubu yai :

Kufinga ve muntu ya kufwa-makutu./ Kutula ve sakuba na nzila/ ke kwisa muntu ya kufwa-meso,/ kansi zitisa Mono. Mono kele Mfumu Nzambi./ Levi 19 :14

[Bana tanga verse yai fraze na fraze ti nge. Na nima, bo songa yo zola tuba nki. Beto vanda nki mutindu ti bantu ya nitu ya kifu ?]

👂 Bankunga ya kwenda nzila mosi ti lesu :

Bana yimba mosi ya bankunga ya ke kwenda nzila mosi ti lesu yai.

👋 Devoir sambu na bakristo :

Beno bakristo, keti nge zaba muntu ya nitu ya kifu ? Devoir mono ke pesa nge na mposo yai, kusala kima mosi ya mbote sambu na muntu yina.

✝ Kubinga bavidu na Yesu :

Beno ya zaba Yesu Kristo ntete ve, nki ke kanga beno nzila kubalula ntima na Yesu ?

Beto ke bonso bantu ya nitu kifu na ntwala na Yandi, sambu beto me sala mbi na meso na Yandi. Mbi na beto me kanga beto nzila kukuma na bwala na Yandi. Yo ke fwaka kinduku na beto ti Yandi.

Kansi Nzambi kele na ntima ya mbote sambu na beto. Yandi me kangula nzila nde beto lenda vutuka na Yandi. Mwana na Yandi Yesu Kristo pesaka moyo na Yandi na zulu ya kulunsi sambu na kufuta mfuka na beto na meso ya Nzambi. Yandi me nunga lufwa, me telama, me manisa kisalu na Yandi na ntoto yai, me vutuka na zulu.

Yandi ta wa bubuyai konso muntu yina ta binga zina na Yandi, bayina ta balula ntima na kieleka yonso. Ketu nge ta tula Yandi ntima bubuyai ?

Kaka binga zina na Yandi. Kudilosa na Yandi. Yandi ta wila nge mawa. Kana nge ke na mfunu ya lusadisu na mambu yai, bikala na nima ya ecodim, ebuna beto ta vanda na kiese kusadisa nge.

Kana ntangu lunga,

📖 Longa mikanda ya Bible :

(Bangindu kele na nsuka ya mukanda yai.)

==NSUKA YA LESO 6

Leso 6



***Kufinga
ve muntu
ya kufwa-
makutu.***

***Kutula ve
sakuba***

***na nzila ke kwisa muntu ya kufwa-
meso,***

kansi zitisa Mono.

Mono kele Mfumu Nzambi.

Levi 19 :14

Leso 7 Davidi kubwaka na masumu ya nene.

2 Samuele 11

I. Preparasio ya Moniteur—

🎯 Kikuma ya lesu :

Bana ta keba sambu bo kubwa ve na mpukumunu, sambu disumu mosi ke bendaka masumu ya nkaka, ke kanga beto ngolo.

♥ Verse ya bubu yai :

Beno lala ve./ Beno samba Nzambi sambu beno kubwa ve na ntangu yai ya mpasi./ Beno ke na luzolo na ntima,/ kansi nitu na beno kele koikoi/. Matayo 26 :41

🗣 Bankunga ya kwenda nzila mosi ti lesu :

Satana Kwisaka Kumeka Yesu

Satana kwisaka kumeka Yesu (3x)
Yandi nungaka ve.

Nzambi, sadisa mono mpi (3x)
Kununga Satana.

Mfumu Zaba Nzila na Mono

Mfumu zaba nzila na mono
Mono fweti landa kaka
Mfumu zaba nzila na mono
Mono fweti landa kaka

Mpukumunu beto ta nunga
Beto tuba 've !' na masumu
Mpukumunu beto ta nunga
Na ngolo ya Yesu kaka !

II. Revisio—

👉 Kuyindula diaka baleso me luta :

Beto monaka nde Mfumu Davidi bambukaka mpila yandi me sila nduku na yandi Yonatani. Muntu mosi kaka me bikala ya bana ya Yonatani. Yandi Mefibosheti, muntu ya makulu yonso zole ya kifu. Davidi yambaka yandi na mesa na yandi ti salaka yandi mbote sambu na tata na yandi Yonatani.

III. Kulonga Leso Yai—

➡ Kuyantika :

Beto me mona kaka mbote sambu na Mfumu Davidi. Kansi ata bantu ya mbote lenda kubwa. Bubuyai beto ta mona kubwa mosi ya nene ya Davidi. Beto ta mona mpila nde disumu mosi kumaka zole, kumaka tatu tii ntangu yo kangaka Davidi ngolo.

🌟 **Developpement (Malongi ya nene ya lesu yai na banti ya malongi 4) :**

7.1 Na ntangu ya bantu ya nkaka me basika, Davidi monaka nkento Batsheba ti salaka bizumba ti yandi. Yo yina, yandi bakaka divumu ya Davidi.

📖 **Tangila bana :** 2 Samuele 11 :1-5

1 Na ...ntangu ya bantotila ke na kikalulu ya kwenda na bitumba, ntotila Davidi tindaka Yoabi ti basoda ya Israele na kwenda kunwana bitumba... Kansi yandi Davidi kwendaka ve, yandi bikalaka ka yandi na Yeruzalemi.

2 Kilumbu mosi na nkokila, Davidi ...yandi kwendaka kutambula na ludi kuna na zulu ya nzo na yandi...yandi ke mona nkento mosi ke yobila, nkento mosi ya kitoko mpenza.

3 ...Batsheba...nkento ya Uria...

4 Ntangu yai, Davidi tindaka bantu na kwenda kubinga yandi. Yandi kwisaka, Davidi lalaka na yandi...


5 Nkento bakaka divumu. Yandi tindaka ndinga na Davidi nde : « Mono ke na divumu. »

❓ **Yula bana bakestio.**

🏠 **Bana sala bageste.**

🗣 **Bana yimba ti kina.**

7.2 Mbala zole, Davidi mekaka kuyidika na mpila nde bakala ya Batsheba, Uria, ta banza yai kele divumu na yandi. Kansi yo simbaka ve.

 **Tangila bana : 2 Samuele 11 :6-13**

6 Ebuna Davidi ... nde : « Tindila mono Uria...»...

7-8 Ntangu Uria kwisaka kukuma.... yandi tubilaka Uria nde : « Kwenda na nzo na nge, nge pema fioti. »...

9 Kansi Uria kumaka na nzo ve. Yandi kwendaka kulala ... ti basoda...

10 Ntangu Davidi waka nde Uria kumaka ve na nzo na yandi, yandi yulaka yandi nde : « Si, nge me katuka ntama, sambu na nki nge me kuma ve na nzo na nge ? »

11 Uria vutulaka nde : « Mfumu, basoda ya Israele ti Yuda ke lala na banzo ya ntenta kuna na bitumba....Ebuna mono, nki mutindu mono lenda kwenda na nzo na mono, na kudia, kunwa ti kulala na nkento na mono ? Kele ve ata fioti ! Mono ke zenga Nzambi nde mono ta sala yo ve ! »

12-13 Ebuna Davidi laukisaka yandi na malafu. Kansi na mpimpa, Uria kwendaka ve na nzo. Yandi lalaka na mbanzi na yandi na kisika ke lalaka basoda...

? Yula bana bakestio.

🏠 Bana sala bageste.

👤 Bana yimba ti kina.

7.3 Yo yina, Davidi salaka na mpila nde bakala na yandi Uria kufwa, sambu na kufika masumu na yandi. 2 Samuele 11 :14-15

 **Tangila bana :**

14 Na suka, Davidi sonikilaka Yoabi mukanda, yandi pesaka Uria na kunata yo.


15 Davidi sonikaka nde : « Tula Uria na ndonga ya ntete, kisika bituma ke luta ngolo, ebuna beno bikisa yandi yandi mosi na ntwala, bambeni kubula yandi, yandi fwa. »

? Yula bana bakestio.

🏠 Bana sala bageste.

👤 Bana yimba ti kina.

7.4 Uria fwaka, ebuna Davidi bakaka Batsheba bonso nkento na yandi. Kansi yo pesaka Nzambi kiese ve.

 **Tangila bana : 2 Samuele 11 :16-27**

16-17 Yo yina, ntangu Yoabi ...tulaka Uria na kisika mosi ya yandi zabaka nde bambeni kele ngolo mingi....Uria mpi kufwaka.

26 Ntangu nkento ya Uria waka nde bakala na yandi me fwa na bitumba, yandi dilaka, yandi lwataka mpidi.

27 Ntangu yandi me katula mpidi imene, Davidi kotisaka yandi na nzo na yandi. Yandi kumaka nkento na yandi. Yandi butilaka yandi mwana ya bakala. Kansi mambu ya Davidi salaka, yo pesaka Mfumu Nzambi kiese ve.

? Yula bana bakestio.

🏠 Bana sala bageste.

👤 Bana yimba ti kina.

>|< Kumanisa :

Davidi vandaka muntu ya zolaka Nzambi mingi, kansi na mambu yai, yandi kubwaka ngolo. Yandi salaka bizumba, ebuna sambu na kufika disumu yina, yandi kusaka luvunu, ti yandi fwaka muntu. Nzambi vandaka na kiese ve na mambu yandi me sala.

♥ Verse ya bubu yai :

Benolala ve./ Benosamba Nzambi sambu benokubwa ve/ na ntangu yai ya mpasi./ Benoke na luzolo na ntima,/ kansi nitu na benokele koikoi./ Matayo 26 :41

👤 Bankunga ya kwenda nzila mosi ti lesu :

Bana yimba nkunga mosi ya ke kwenda nzila mosi ti lesu yai.

👤 Devoir sambu na bakristo :

Beno bakristo, kuyindula ve nde beno lenda kubwa ve na masumu. Devoir mono ke pesa beno, mposo yai beno keba ti samba sambu beno kubwa ve.

✝ Kubinga bavidi na Yesu :

Kana nge me balula ntima na Yesu ntete ve,
nge lenda zaba nde Nzambi kele na kiese na
nge ve ata fioti. Keti nge ta kwisa na Yandi
bubuyai sambu Yandi lolula nge ti kitula nge
mwana na yandi ? Beto ta vanda awa na nima
ya ecodim sambu na kusadisa nge.

**Kana ntangu lunga,  Longa mikanda ya
Bible :**

(Bangindu kele na nsuka ya mukanda yai.)

==NSUKA YA LESO 7

Leso 7



***Beno
lala
ve.***

***Beno samba Nzambi
sambu beno kubwa ve na
ntangu yai ya mpasi.***

***Beno ke na luzolo na ntima,
kansi nitu na beno kele koikoi.***

Matayo 26 :41

Leso 8 Davidi balulaka ntima ngolo.

2 Samuele 12, Bitini ya Bankunga 32, 38, 51

I. Preparasio ya Moniteur—

🎯 Kikuma ya lesa :

Kana bana me vila nzila, me sala mbi, bo fika yo ve, kansi bo ndima, bo vutuka na Nzambi nswalu sambu Yandi lolula beto.

♥ Verse ya bubu yai :

*Luzingu na nge ta bongwa ve/ kana nge meka kubumba masumu na nge./
Ndima yo,/ balula ntima na nge./
Ebuna Nzambi/ ta wila nge mawa./
Bingana 28 :13*

🗨 Bankunga ya kwenda nzila mosi ti lesa :

Tesa Mono

Tesa mono, Tala ntima mono
Tesa ye meka, mabanza na mono.

Tala kana mbi, Me kota na mono
Yobisa ye lolula Mbi yonso !

Nzambi Ta Kuwa Nge

Nzambi ta kuwa nge (3X) Na zina ya Yesu !
Yandi ta lolula (3x) Kana nge balula ntima.

II. Revisio—

† Kuyindula diaka baleso me luta :

Na mposo me luta, beto monaka mpila nde, ata Davidi zolaka Nzambi mingi, yandi bwaka ngolo na mambu ya nkento yai Batsheba. Yandi mekaka kubumba masumu na yandi sambu yo monika ve. Kansi luzingu na yandi vandaka kubonga ve mpila yina. Yo bendaka masumu ya nkaka—kukusa luvunu, ata kufwa muntu. Beto monaka nde ata Davidi monaka nde yandi me bumba yo na bantu, Nzambi zabaka yo, ti yo pesaka Yandi kiese ve.

III. Kulonga Lesa Yai—

⇒ Kuyantika :

Nki ta salama ntangu yai ? Davidi me bebisa ngolo. Ee, beto, kana beto bebisa, nki beto

fweti sala ?

🏠 **Developpement (Malongi ya nene ya lesa yai na banti ya malongi 4) :**

8.1 Nzambi tindaka profete Natani na Davidi kusonga yandi na kingana mbi ya yandi me sala.

📖 **Tangila bana :** 2 Samuele 12 :1-9

1 Mfumu Nzambi tindaka profete Natani na Davidi... kutubila yandi nde : « Kuvandaka na bantu zole na bwala mosi. Muntu mosi vandaka mvwama, ya nkaka nsukami.

2-3 Mvwama vandaka na bangombe ti mameme mingi, kansi nsukami vandaka ka yandi kaka na kamwa-dimeme mosi

4 Kilumbu mosi, nzenza mosi kwisaka kutala mvwama yina. Yandi zolaka ve kufwa ata ngombe, ata dimeme na yandi mosi sambu na kulambila nzenza yina, kansi yandi kwendaka kubaka dimeme ya nsukami. Yandi fwaka yo.... »

5-6 Davidi wilaka mvwama yina makasi mingi. Yandi tubaka nde, « Na zina ya Mfumu Nzambi ya moyo, muntu yina fweti fwa ! »...yandi me sala mpidina kukonda mawa... »

7 Profete Natani tubaka na Ntotila Davidi nde : « Muntu yina si nge ! Wa mambu yai ya Mfumu Nzambi...ke tuba na nge : '....


9 ...Sambu na nki nge vwendaka bansiku na Mono Mfumu Nzambi na kusala mambu yina ke pesa mono kiese ve ? Nge botulaka nkento ya Uria...ebuna na nima nge salaka yonso na mpila nde bantu ya Amoni kufwa yandi. Na kutuba mbote, nge muntu kufwaka yandi.

❓ **Yula bana bakestio.**

🏠 **Bana sala bageste.**

🗨 **Bana yimba ti kina.**

8.2 Nswalu, Davidi ndimaka masumu na yandi kukonda kubumba yo. Yo yina, Nzambi lolulaka yandi.

 **Tangila bana** : 2 Samuele 12 :13a


13a Davidi tubaka na Natani nde : « Mono me sala masumu na meso ya Mfumu Nzambi. »

? Yula bana bakestio.

🏠 Bana sala bageste.

🗣️ Bana yimba ti kina.

8.3 Kansi, ata Nzambi lolulaka Davidi, mambu ya mpasi fweti landa masumu na yandi.

 **Tangila bana** : 2 Samuele 12 :11-12, 14

11 Wa mbote mambu ya mono Mfumu Nzambi ke tubila nge : ...muntu na fami na nge mpenza yina ta kotisa nge na mpasi....


14 ...mwana na nge yina me butuka, yandi fweti fwa, sambu nge me vwenza Mfumu Nzambi na mambu yai. »

? Yula bana bakestio.

🏠 Bana sala bageste.

🗣️ Bana yimba ti kina.

8.4 Davidi sonikaka ndambu bankunga kusonga kiese na mpila Nzambi me lolula yandi.

 **Tangila bana** : Bankunga 32, 38 & 51

32 :3 Ntangu mono vandaka kundima masumu na mono ve, Nitu na mono vandaka kulemba sambu na kudila ntangu yonso.

4Mono yumaka bonso masa ke yumaka na ntangu ya musibu.

5 Kansi na nima mono ndimaka masumu na mono na meso na Nge.... Ebuna Nge lolulaka mono sambu na mbi yina yonso.

38 :6 Bamputa na mono ke basika nsudi Yo me pola sambu na kilau na mono.

51 : 4 Mono ya mvimba ke na mvindu sambu na mbi na mono yonso.

Sukula mono, masumu na mono kumana.

9 Katula masumu na mono, ebuna ntima na

mono ta vanda mpembe.

Yobisa mono, mpidina mono ta kuma mpembe mpenza.

? Yula bana bakestio.

🏠 Bana sala bageste.

🗣️ Bana yimba ti kina.

»|< Kumanisa :

Beto mona nde ntangu Davidi mekaka kubumba masumu na yandi, yo vandaka kusadisa yandi ve. Kansi ntangu yandi bakisaka mbi ya yandi me sala, yandi ndimaka yo nswalu. Yo yina, Nzambi lolulaka yandi, ti kiese vutukaka na kati na yandi ti Nzambi.

Kansi, Nzambi katulaka ve bamambu ya mpasi ya landaka masumu na yandi. Beto binga yo na français "Conséquences". Yo kele mambu ya ke landaka mpila beto me sala. Mwana me butuka. Yo lenda vutuka ve. Uria me fwa. Nzambi vutulaka yandi na moyo ve. Nzambi songaka Davidi nde mwana na yandi me buta ti Batsheba, yandi ta fwa. Mambu ya bampasi landaka, kansi kinduku ti Nzambi me vutuka. Kiese mingi na yo.

♥ Verse ya bubu yai :

*Luzingu na nge ta bonga ve/ kana nge meka kubumba masumu na nge./
Ndimayo, balula ntima na nge,/
Ebuna Nzambi/ ta wila nge mawa./
Bingana 28 :13*

[Bana tuba yo fraze na fraze na nima ya nge. Bo songa nki mutindu verse yai me monika na luzingu ya Davidi.]

🗣️ Bankunga ya kwenda nzila mosi ti lesu :

Bana yimba mosi ya bankunga ke kwenda nzila mosi ti lesu yai.

👉 Devoir sambu na bakristo :

Beno bakristo, devoir mono ke pesa beno kele, konso mbala ya beno mona nde beno me sala mbi, vutuka na Nzambi nswalu. [Bana repeter : Vutuka na Nzambi nswalu, ee, vutuka na Nzambi nswalu !]

✝ Kubinga bavidu na Yesu :

Kansi mbala ya nkaka nge zaba Yesu bonso
Mvulusi na nge ve. Nge me wa bahistoire na
Yandi, kansi nge me tula Yandi kivuvu ntete ve.

Kana nge bakisa nde nge kele nkwa-masumu,
kana nge zola kubalula ti kukuma mulonguki ya
Yesu, kaka binga Yandi sika ya nge ikele.
Kudilosa na Yandi. Songa Yandi nde nge
kwikila na ntima na nge yonso nde Yandi kele
Mwana-Nzambi ya me kwisa sambu na
kukatula masumu na nge. Yandi fwaka na zulu
ya kulunsi, kansi Yandi telamaka. Yandi kele na
moyo bubuyai ti mvu ya mvu.

Bible ke tuba nde konso muntu yina binga zina
na Yandi, yandi ta guluka. Kana nge ke na
mfunu ya beto kutendula kuluta, nge lenda
bikala na nima ya ecodim. Beto ta sadisa nge.

Kana ntangu lunga,



Longa mikanda ya Bible :

(Bangindu kele na nsuka ya mukanda yai.)

==NSUKA YA LESO 8

Leso 8



***Luzingu na nge ta bonga ve
kana nge meka kubumba masumu
na nge.***

***Ndimayo, balula ntima na nge,
Ebuna Nzambi ta wila nge mawa.***

Bingana 28 :13

Leso 9 Mwana ya Davidi Absalomi yibaka kimfumu.

2 Samuele 15-16

I. Preparasio ya Moniteur—

🕒 Kikuma ya lesa :

Bana ta tina masumu, sambu bo ta bakisa nde mambu ya mpasi ke landaka yo, ata Nzambi lolula beto.

♥ Verse ya bubu yai :

Beno kudikusa ve,/ sambu bo ke sekaka Nzambi ve./ Muntu ke katulaka bambuma/ yina ya yandi ke kunaka. Galatia 6 :7

🗣️ Bankunga ya kwenda nzila mosi ti lesa :

Tula verse ya bubu yai na nkunga. Sala pratike, ebuna yimba yo ti bana.

II. Revisio—

↑ Kuyindula diaka baleso me luta :

Beto me mona nde Davidi salaka masumu ya ngolo, kansi ntangu profete Natani songaka yandi mbi yina, yandi ndimaka yo nswalu. Yandi vutukaka na Nzambi, ti Nzambi lolulaka yandi. Kiese mingi na yo.

III. Kulonga Leso Yai—

➡ Kuyantika :

Kansi beto me longuka mpi nde makambu ya mpasi landaka masumu ya Davidi. Profete Natani tubaka nde mwana na yandi ta fwa, ti yo salamaka. Natani tubaka nde bana ya Davidi ta sala mavanga na fami. Bonso yandi tubaka, yo salamaka. Bo yantikaka kusala mbi bo na bo. Sambu na mbi yina, mwana ya Davidi Absalomi vandaka kuzinga ti tata diaka ve. Bubuyai beto ta mona mambu mosi ya mbi ya Absalomi salaka na tata na yandi Davidi.

🏠 **Developpement (Malongi ya nene ya lesa yai na banti ya malongi 4) :**

9.1 Absalomi yantikaka kuyidika lukanu sambu yandi kuma ntotila, yandi botula

kimfumu ya tata na yandi David .

📖 **Tangila bana : 2 Samuele 15 :1-12**

*1-4 ...Konso kilumbu na suka-suka, ...Absalomi fweti tuba nde : « ...ke na muntu ve kuna na ntotila yina ta wila nge. »... « A, kana bo tulaka **mono** zuzi ya nsi yai ! Konso muntu yina ke na makambu zolaka kwisa na mono, ebuna **mono** zolaka kunungisa yandi kaka. »*

5 Kana muntu yango kupusana penepene na yandi ti kufukama ilungi na ntoto na ntwala na yandi, Absalomi fweti simba yandi na diboko, kuyamba yandi ti kupesa yandi beze.

10 ...yandi tindaka bantu na yandi na kwenda kutuba mambu yai na makanda yonso ya Israele nde : « Ntangu beno ke wa mpungi ke dila, beno fweti tuba nde : ‘Absalomi me kuma ntotila...’ »

11-12 Absalomi kwendaka ti bantu ya Yeruzalemi 200 ya yandi bingaka....bantu mingi yantikaka kulanda Absalomi.

❓ **Yula bana bakestio.**

🏠 **Bana sala bageste.**

🗣️ **Bana yimba ti kina.**

9.2 Davidi tinaka Yeruzalemi kudibumba na nseke.

📖 **Tangila bana : 2 Samuele 15 :13-37**

13 Muntu mosi kwisaka kusonga Davidi nde : « Bantu ya Israele yonso meso na bo me kuma kutala kaka Absalomi. »

14 Ebuna Davidi tubaka na bantu na yandi ...nde : « Beto tineno, kana ve beto ta guluka ve na maboko ya Absalomi !

15 Bantu na yandi tubaka nde : « Mfumu, beto ta sala kaka mutindu nge me zenga. »

16 Yo yina, Ntotila Davidi katukaka na bwala ti fami na yandi yonso ti bantu na yandi yonso. Kaka bankento na yandi kumi ...bikalaka na kukengila nzo ya kimfumu.

? Yula bana bakestio.

🏠 Bana sala bageste.

👤 Bana yimba ti kina.

9.3 Siba sadisaka yandi na nzila, kansi Shimei fingaka yandi.

📖 **Tangila bana** : 2 Samuele 16 :1-13

Siba sadisaka

1 ...Siba kwisaka kukutana na yandi... ti bampunda zole ke nata mampa 200, bisuka 100 ya bambuma ya vinu ya kuyuma, bisuka 100 ya bafigue ya kutela, ti dibungu mosi ya vinu.

2 ...Siba...nde : « Mfumu, bampunda kele sambu na fami na nge, mampa ti bambuma kele madia sambu na basoda na nge, ebuna vinu kele sambu na bantu yina ta lembe na ntoto ya zelo na zelo. »

Shimei fingaka

5-6 ...muntu mosi ya dikanda ya Saule, zina na yandi Shimei... kwisaka kubasika ke finga Davidi. Shimei yantikaka kulosa yandi matadi ti bantu na yandi...

7 Yandi fingaka Davidi nde : « Katuka awa ! Katuka awa ! Nge muntu ya mpamba yai ke fwaka bantu !... »

? Yula bana bakestio.

🏠 Bana sala bageste.

👤 Bana yimba ti kina.

9.4 Absalomi kotaka Yeruzalem ti simbaka kimfumu. Yandi bakaka bankento ya Davidi bonso bankento na yandi.

📖 **Tangila bana** : 2 Samuele 16 :15-22

20 Ntangu yai, Absalomi tubaka na (konseyere) Ahitofele nde : « Beno songa beto nki beto ta sala. »

21 Ahitofele nde : « Kwenda na (bankento) yina ya tata na nge kubikaka sambu na kukengilaka nzo ya kimfumu. Mpidina, bantu yonso ya Israele ...ta baka kikesa. »

22 Bo yidikaka nzo ya ntenta sambu na

Absalomi na ludi kuna na zulu ya nzo, ebuna na meso ya bantu yonso yandi kwendaka kulala na (bankento) ya tata na yandi.

? Yula bana bakestio.

🏠 Bana sala bageste.

👤 Bana yimba ti kina.

➤|< Kumanisa :

Bana, keti beno bambuka nki Nzambi tubaka ta landa masumu ya Davidi ? Mwana na yandi ya bebe ta fwa, ti mpasi ta telama na kati ya fami na yandi. Ntangu yai, mpasi me telama. Mwana na yandi mosi Absalomi me sala rebelio, me botula kimfumu na yandi. O, masumu ke sadisa beto ve. Nzambi sadisa beto kutina yo !

♥ Verse ya bubu yai :

Beno kudikusa ve,/ sambu bo ke sekaka Nzambi ve./ Muntu ke katulaka bambuma/ yina ya yandi ke kunaka. Galatia 6 :7

[Bana yonso tuba yo ti yimba yo. Bana ya niveau secondaire solula nki mutindu verse yai ke monika na luzingu ya Davidi.]

👤 Bankunga ya kwenda nzila mosi ti leso :

Bana yimba nkunga mosi ya kwenda nzila mosi ti leso yai.

👤 Devoir sambu na bakristo :

Beno bakristo, mono ke pesa beno devoir nde beno tula ngolo kutina masumu na mposo yai.

✝ Kubinga bavidu na Yesu :

Kana nge me balula ntima na Yesu ntete ve, zaba nde masumu me kanga nge kaka. Yo me fwaka kintwadi ya nge ti Tata Nzambi. Kansi kana nge ta balula ntima, ndima masumu na nge, tula kivuvu kaka na Yesu Kristo bubuyai, Yandi ta gulusa nge. Kana nge ke na mfunu ya lusadis, kwisa na beto na nima ya ecodim.

Kana ntangu lunga,

📖 Longa mikanda ya Bible :

(Bangindu kele na nsuka ya mukanda yai.)

==NSUKA YA LESO 9

Leso 9



***Beno
kudikusa
ve,***

sambu bo ke sekaka Nzambi ve.

***Muntu ke katulaka bambuma yina
ya yandi ke kunaka.***

Galatia 6 :7

Leso 10 Absalomi fwaka, ti kimfumu vutukaka na Davidi.

2 Samuele 18, 19:1

I. Preparasio ya Moniteur—

🕒 Kikuma ya lesa :

Bana ta zitisa bibuti na bo, sambu, kana ve, yo lenda kumisa luzingu na bo nkufi.

♥ Verse ya bubu yai :

Zitisa tata na nge ti mama na nge./ Mpidina nge ta zinqa bilumbu mingi/ na ntoto ya mono Mfumumu Nzambi,/ Nzambi na nge, ke pesa nge./ Kubasika 20 :12

🗨️ Bankunga ya kwenda nzila mosi ti lesa :

Bansiku Kumi Kulanda

Nzambi kupesaka
Bansiku kumi (3x)
Ya beto fweti kulanda.

Ntete, kusamba kaka
Yandi, Nzambi (3x)
Nsiku ya ntete kulanda

Ya tanu, zitisa. Tata ti mama (3x)
Nsiku ya tanu kulanda

II. Revisio—

† Kuyindula diaka baleso me luta:

Beto me mona nde Absalomi, mwana ya ntotila, vandaka muntu ya kwendaka kubotula kimfumu na yandi. Yo yina, Davidi tinaka. Yandi vandaka na kiti ya kimfumu diaka ve, kansi yandi vandaka kudibumba na nseke.

III. Kulonga Leso Yai—

⇒ Kuyantika :

[Moniteur, yantika na verse ya bubu yai. Nge tangila bana, ebuna bo landa fraze na fraze kaka mbala mosi na nima ya nge.]

Keti Absalomi songaka luzitu na tata na yandi Davidi ? Ikele ve ata fioti. Keti luzingu na yandi

ta vanda na nda, to ya nkufi ? Beto ta mona na lesa ya bubuyai.

🏠 Developpement (Malongi ya nene ya lesa yai na banti ya malongi 4) :

10.1 Davidi tindaka basoda kunwanisa bantu ya Absalomi, kansi yandi songaka bo kusala mwana na yandi Absalomi mbi ve.

📖 Tangila bana : 2 Samuele 18 :1-7

1 Ntotila Davidi bingaka bantu na yandi yonso kisika mosi...

5 Yandi songaka Yoabi, Abishai, ti Itai nde : « Pardo, sambu na mono, beno sala mwana na mono Absalomi mbi ve. »

6-7 Basoda ya Davidi kwendaka kunwana bitumba na basoda ya Israele....Kuna basoda ya Israele belaka na bantu ya Davidi....

? Yula bana bakestio.

🗨️ Bana sala bageste.

🗨️ Bana yimba ti kina.

10.2 Basoda landaka bantu ya Absalomi tii na kati ya mfinda. Bo monaka nde nsuki ya nda ya Absalomi me kangama na nti, yandi na kati ya zulu ti ntoto.

📖 Tangila bana : 2 Samuele 18 :9

9 Absalomi kutanaka na basoda ya Davidi ...Yandi vandaka na zulu ya mpunda. Ntangu mpunda zolaka kuluta na nsi ya nti mosi ya nene, ntu ya Absalomi kangamaka na balutangu. Mpunda tinaka, ebuna Absalomi bikaka kukangama na nti, kwaku zulu, kwaku ntoto, yandi na kati.

? Yula bana bakestio.

🗨️ Bana sala bageste.

🗨️ Bana yimba ti kina.

10.3 Yoabi fwaka Absalomi na mbele, ebuna bantu kumi ya nkaka manisaka yo.

📖 Tangila bana : 2 Samuele 18 :14-15

14 Yoabibakaka makonga tatu, yandi kwendaka kubula yo na ntima ya Absalomi. Pana Absalomi vandaka me kangama kaka na nti. Yandi me fwa ntete ve.


15 Ebuna basoda kumi ya Yoabi kwisaka kuziunga Absalomi. Bo fwaka yandi kimakulu.

? Yula bana bakestio.

🏠 Bana sala bageste.

👤 Bana yimba ti kina.

10.4 Ndinga kwisaka na Davidi, ebuna Davidi dilaka ngolo na mawa.

 **Tangila bana :** 2 Samuele 18 : 31-33, 19 :1

31 Ntangu yai, muntu ya Etiopia mpi kwisaka kukuma, ti kutuba nde : « Nsangu ya mbote, mfumu ! » Bubu yai, Nzambi me nungisa nge na bambeni na nge yonso ! »

32 Ntotila yulaka nde : « Ebwe Absalomi ? Keti yandi kele mbote ? » Muntu yina nde : « Mbote kana bambeni na nge yonso ti bayina yonso ke sala nge mubulu, mpasi kubwila bo bonso mwana-bakala yina. »

19 :1 Ntotila Davidi, mawa simbaka yandi mpenza....Yandi vandaka kwenda kudila nde : « A mwana na mone-e ! A mwana na mono Absalomi...A kana mono fwaka na kisika na nge, mwana na mono. A Absalomi-e!

? Yula bana bakestio.

🏠 Bana sala bageste.

👤 Bana yimba ti kina.

➤|< Kumanisa :

Davidi zolaka mwana na yandi Absalomi mingi, kansi Absalomi zitisaka tata na yandi ve. Yandi salaka rebelio sambu na kubotula kimfumu na tata. Yandi nwanisaka tata na yandi. Yandi yindulaka kufwa tata, kansi Nzambi salaka na mpila nde Absalomi vandaka muntu ya kufwaka. Sambu na nki yandi fweti kufwa ? Kaka sambu yandi vandaka kuzitisa tata na yandi ve. O, mbala mingi bana ya zitisa bibuti

ve, Nzambi zenga luzingu na bo, yo vanda nkufi. Nsiku ya Nzambi tuba nde, kuzitisa bibuti, yo ke yika beto bamvula.

♥ Verse ya bubu yai :

Zitisa tata na nge ti mama na nge./ Mpidina nge ta zinga bilumbu mingi/ na ntoto ya mono Mfumu Nzambi,/ Nzambi na nge, ke pesa nge./ Kubasika 20 :12

[Bana ya 1ere tuba yo fraze na fraze na zulu ya nge, bana ya 2eme, etc. Keti Absalomi lemfukaka na verse yai? (Ikele ve.) Na nsuka yo salaka yandi nki? (Yo fwaka yandi. Yandi monaka bamvula mingi ve.)]

👤 Bankunga ya kwenda nzila mosi ti lesu :

Bana yimba nkunga mosi ya ke kwenda nzila mosi ti lesu yai.

👋 Devoir sambu na bakristo :

Bana bakristo, devoir mono ke pesa beno mposo yai, yo yai : Beno tula ngolo kuzitisa bibuti na beno. Nzambi ta sakumuna beno.

✝ Kubinga bavidu na Yesu :

Kana nge me yamba Yesu Kristo, Mwana ya Nzambi ntete ve na ntima ti na luzingu na nge, nge ta vanda na ngolo ve kulemfuka na nsiku yai. Nge ta vanda na ngolo ve kulemfuka na bansiku yonso ya Nzambi.

Keti nge ke na nzala kukuma mulandi ya kieleka ya Yesu ? Kaka balula ntima na nge, tula lukwikilu yonso kaka na Yandi. Songa Yandi nde nge kwikila Yandi fwaka na sika na nge, Yandi telamaka na lufwa. Songa Yandi nde nge zola kulanda Yandi. Lomba Yandi kukota luzingu, kugulusa nge. Bible ke songa beto nde konso muntu ya binga zina na Yandi na kieleka yonso, yandi ta guluka (Roma 10 :3). Yandi me sila nde konso muntu ya kwisa na Yandi, Yandi ta buya muntu yina ve (Yoane 6 :37). Keti nge ta kwisa na Yandi bubuyai ?

Kana ntangu lunga,

📖 Longa mikanda ya Bible :

(Bangindu kele na nsuka ya mukanda yai.)

==NSUKA YA LESO 10

Leso 10



***Zitisa
tata
na
nge ti***

mama na nge.

***Mpidina nge ta zinga bilumbu
mingi na ntoto ya mono Mfumu
Nzambi, Nzambi na nge, ke pesa
nge.***

Kubasika 20 :12

Leso 11 Davidi nungaka na bitumba mingi, ebuna yandi yimbaka nkunga sambu na kumisa Nzambi.

2 Samuele 22, Bankunga 18

I. Preparasio ya Moniteur—

🎯 Kikuma ya lesu :

Bana ta kumisa Nzami na bampila yonso ya Yandi me sadisaka beto.

♥ Verse ya bubu yai :

Lukumu na Mfumu Nzambi !/ Lukumu na dikunzi na mono !/ Lukumu kuvanda na Nzambi yai/ ke gulusaka mono !/ 2 Samuele 2 :22

[NB sambu na bana ya niveau secondaire : Beto mona verse yai diaka na Bankunga 18 :47.]

🗣️ Bankunga ya kwenda nzila mosi ti lesu :

Kitoko (Ton : Eidelveiss)

Kitoko ! Kitoko ! Yesu, Mfumu na Beto
Kitoko ! Kitoko ! Zitisa zina na Yandi !

Mvutu :

Mfumu ya Bamfumu yonso
Lukumu na zina na Yandi
Bubu, ye mvu ya mvu
Mono ta landa kaka Yandi.

Bandeke Kele Yimba

Bandeke kele yimba, na Yandi
Bawanzio kumisa, zina n'Yandi
Bintuntu kele songa, kitoko na bo
'Buna beto bana na Yandi, Kumisa Yandi mpi !

II. Revisio—

👉 Kuyindula diaka baleso me luta :

Na lesu me luta, beto monaka mpila mwana ya Davidi Absalomi zitisaka ve tata na yandi. Absalomi zolaka kuyiba kimfumu ya tata na yandi. Kansi basoda ya Davidi vandaka kwikama na yandi. Ntangu ntu ya Absalomi kangamaka na balutangu nti, bo fwaka yandi. Kimfumu vutukaka na Davidi, kansi yandi monaka mawa mingi sambu na Absalomi, mwana na yandi.

III. Kulonga Leso Yai—

➡ Kuyantika :

Davidi vutukaka na kimfumu na yandi. Yandi nwanisaka bambeni mingi na bamvita, ti Nzambi nungisaka yandi. Yo yina, Davidi vandaka na ntima ya lutondo. Yandi sonikaka nkunga sambu na kumisa Nzambi na bampila yonso Nzambi me sadisa yandi. Beto ke tanga yo na 2 Samuele 22, kansi bo tulaka yo mpi na mukanda ya bankunga sambu bantu ya Israele yonso kuyimba yo. Beto mona nkunga yai mpi na Bankunga 18.

🏠 Developpement (Malongi ya nene ya lesu yai na banti ya malongi 4) :

11.1 Davidi kumisaka Nzambi nswalu na yonso ya mbote Nzambi me sala yandi.

📖 Tangila bana : 2 Samuele 22 :1-2

1 Nkunga yai Ntotila Davidi yimbilaka Mfumu Nzambi ntangu Nzambi gulusaka yandi na maboko ya ...bambeni na yandi... :

2 Mfumu Nzambi, nge kele Dikunzi na mono,
Nge kele kisika ya ngolo ya mono ke tininaka,
Nge Muntu ke gulusaka mono na bambeni.

? Yula bana bakestio.

🏠 Bana sala bageste.

🗣️ Bana yimba ti kina.

11.2 David bakisaka nde kaka Nzambi me gulusa yandi.

📖 Tangila bana : 2 Samuele 22 :3-4

3 Nzambi, Nge kele Ditadi,
Kisika ya mono ke bumbanaka.

Nge kele Dibaya yina ke taninaka mono na batolotolo ya bambeni,

Nge kele Lupangu ya bibaka ya ngolo,
Kisika ya nene ya mono ke pemaka.

Nge kele Ngulusi na mono.
Nge ke taninaka mono,

Nge ke botulaka mono na maboko ya bantu ya nku.

4. Mfumu Nzambi, ntangu mono ke lomba Nge na kwisa kusadisa mono, Nge ke gulusaka mono na maboko ya bambeni.


Lukumu na Nge, Mfumu Nzambi !

? Yula bana bakestio.

🕯️ Bana sala bageste.

🗣️ Bana yimba ti kina.

11.3 Davidi bakisaka nde yandi vandaka kieleka na mpasi ya lufwa, kansi Nzambi me sadisa yandi.

 **Tangila bana :** 2 Samuele 22 :5-6, 17-18

5 Ngolo ya lufwa ziungaka mono, Nsudi na yo pesaka mono boma.

6 Nsi ya bafwa vingilaka mono, Maziamu tudilaka mono mutambu.

17 Mfumu Nzambi kuna na zulu ya Yandi kele, Yandi kulumusaka diboko na Yandi, Yandi simbaka mono.


18 Yandi botulaka mono na maboko ya bambeni Ti bantu yonso yina ke mengaka mono, Bayina me lutaka mono na ngolo.

? Yula bana bakestio.

🕯️ Bana sala bageste.

🗣️ Bana yimba ti kina.

11.4 Davidi kumisaka Nzambi na mpila Yandi pesaka yandi ngolo kusala mambu yonso ya mfunu. Yandi kumisaka Nzambi na meso ya bantu.

 **Tangila bana :** 2 Samuele 22 : 30-31, 50

30 Na ngolo na Nge, mono lenda nwanisa bambeni mingi,

Mono lenda kota-kota mpi ata na balupangu na bo ya ngolo.

31 Mambu ya Nzambi ke salaka, ya kieleka yo kele mbote mpenza ! Mambu ya Yandi ke tubaka, Yandi ke lungisaka yo.

Na bantu yina ke tinaka na Yandi, Yandi kele bonso Dibaya yina ke taninaka muntu na batolotolo ya bambeni.

50 Yo yina mono ta kumisaka Nge na meso ya bantu ya nkaka, Mono ta yimbilaka Nge bankunga ya lukumu.

Niveau Secondaire--2 Samuel 22:50 (LS1910)
...je te louerai parmi les nations...

➤|< Kumanisa :

Ntangu Nzambi nungisaka Davidi na bamvita, yandi pesaka Nzambi lukumu mingi. Nzambi mpi me sala mambu mingi ya mbote sambu na beto. Keti beto mpi kele kupesa yandi lukumu?

♥ Verse ya bubu yai :

Lukumu na Mfumu Nzambi !/

Lukumu na dikunzi na mono !/

Lukumu kuvanda na Nzambi yai/

ke gulusaka mono !/ 2 Samuele 2 :22

[NB sambu na bana ya niveau secondaire : Beto mona yo diaka na Bankunga 18 :47. Nkunga yai, ntangu Davidi vandaka kuvikisa bankunga ya Israele, yandi tulaka yo na kati.]

[Konso ntangu ya bana tuba 'lukumu,' bo nangula diboko ngolo na zulu.]

🗣️ Bankunga ya kwenda nzila mosi ti lesu :

Bana yimba nkunga mosi ya ke kwenda nzila mosi ti lesu yai.

👉 Devoir sambu na bakristo :


Beno bakristo, devoir mono ke pesa beno, yo yai : Beno tula ngolo na mposo yai ya kumisa Nzambi ya kuluta.

✝ Kubinga bavididi na Yesu :

Keti nge mona mpasi kumisa Nzambi ? Mbala ya nkaka nge ke mona mpasi sambu nge me balula ntima na Yesu ntete ve. Yandi me sala yonso dezia sambu na kugulusa nge. Yandi me

bika nzo na Yandi ya kitoko na zulu, me
kulumuka awa na nsi ntoto sambu na nge.
Yandi me mona mpasi, me fwaka na zulu ya
kulunsi sambu na kubaka masumu na nge.
Yandi me telama na lufwa. Yandi ke kinga nge
kumona mpasi sambu na masumu na nge,
kubalula ntima, kutula lukwikilu na Yandi.
Yandi ta gulusa nge bubuyai kana nge ta binga
zina na yandi.

Kana ntangu lunga,

 **Longa mikanda ya Bible :**
(Bangindu kele na nsuka ya mukanda yai.)

==NSUKA YA LESO 11

Leso 11



***Lukumu na Mfumu Nzambi !
Lukumu na dikunzi na mono !
Lukumu kuvanda na Nzambi
yai
ke gulusaka mono !***

2 Samuele 2 :22

Leso 12 Davidi tubaka bandinga ya nsuka.

2 Samuele 23

I. Preparasio ya Moniteur—

🕒 Kikuma ya lesa :

Bana ta tula ntima nde Nzambi ta lungisa ndinga na Yandi.

♥ Verse ya bubu yai :

...Yandi me wakana ti mono/ kuwakana ya kukonda nsuka,
kuwakana mosi/ ya Yandi ta bebisa ve./ ya Yandi ta landaka tii kuna/...2 Samuele 23 :5

🗨️ Nkunga ya kwenda nzila mosi ti lesa :

Yonso ya Nzambi Tuba

Yonso ya Nzambi Tuba, Yandi fweti sala.
Yandi fweti sala yo, Yandi ke kieleka.

Mono tula ntima, Na yonso Yandi tuba
Yonso ya Nzambi tuba, Yandi fweti sala.

II. Revisio—

👉 Kuyindula diaka baleso me luta:

Beto me mona nde Nzambi nungisaka Mfumu Davidi na bamvita mingi, yo yina Davidi pesaka Nzambi lukumu. Yandi sonikaka bankunga sambu na kuyimbila Nzambi, ti yandi vukisaka bankunga na yandi ti bankunga ya bantu ya nkaka, na mukanda. Mukanda yina kele na kati ya Bible na beto--mukanda beto binga Bankunga.

III. Kulonga Leso Yai—

➡ **Kuyantika :** Na nima ya bamvula, Davidi me nuna. Yandi me landa kaka kusonika bankunga ya louange. Na kati ya bankunga yina, yandi vandaka kubambuka mpila Nzambi me sala na luzingu na yandi, ti bansilulu yonso ya mbote ya Nzambi me pesa yandi.

🕸 **Developpement (Malongi ya nene ya lesa yai na banti ya malongi 4) :**

12.1 Davidi tubaka bandinga ya nsuka na

yandi, bandinga ya Mpeve ya Nzambi songaka yandi.

📖 **Tangila bana :** 2 Samuele 23 :1-2

1 Davidi...kele muntu ya Nzambi kumisaka muntu ya nene. Yandi muntu yina ya Nzambi ...solaka na kuvanda ntotila. Yandi mpi muntu yidikaka bankunga ya kitoko sambu na bantu ya Israele. Yai mambu ya nsuka ya Yandi tubaka :

*2 Mpeve ya Mfumu Nzambi ke tubaka na munoko na mono,
mambu na Yandi kele na ludimi na mono.*

? **Yula bana bakestio.**

🕸 **Bana sala bageste.**

🗨️ **Bana yimba ti kina.**

12.2 Nzambi songaka Davidi nde, Yandi vandaka na kiese na mpila Davidi me yala Israele.

📖 **Tangila bana :** 2 Samuele 23 :3-4

*3 Nzambi ya Israele me tuba,
Dikunzi ya Israele me tubila mono nde :
« Mfumu yina ke yalaka bantu mbote, yina ke yalaka na kuzitisa Nzambi na ntima na yandi,*

*4 Yandi kele bonso mwini ya suka bu ntangu ke basika kukonda matuti,
Mwini yina ke pelaka na zulu ya matiti kana mvula me noka. »*

? **Yula bana bakestio.**

🕸 **Bana sala bageste.**

🗨️ **Bana yimba ti kina.**

12.3 Davidi tulaka Nzambi ntima nde Yandi ta lungisa bansilulu yonso Yandi me pesa sambu na fami ya Davidi.

📖 **Tangila bana :** 2 Samuele 23 :5

*5 Mutindu yo yina Nzambi ta sakumuna fami na mono,
sambu Yandi me wakana ti mono
kukwakana ya kukonda nsuka,
kuwakana mosi ya Yandi ta bebisa ve,*

ya Yandi ta landaka tii kuna !

Yina ve kuguluka na mono mpenza ti kiese na mono ?

Keti Yandi ta lungisa yo yonso ve ?

? Yula bana bakestio.

🏠 Bana sala bageste.

👤 Bana yimba ti kina.

12.4 Davidi bakisaka nde kulanda nzila ya bantu ya mbi vandaka bonso kudifwa.

 **Tangila bana :** 2 Samuele 23 :6

6 Kansi bantu ya mbi kele bonso bansende ya bo ke losaka,

Ata muntu mosi ve lenda simba yo na maboko.

Na kusimba yo, muntu fweti sadila kibende to dikonga, bo ta tula yo na tiya, yo zika mpenza.

? Yula bana bakestio.

🏠 Bana sala bageste.

👤 Bana yimba ti kina.

>|< Kumanisa :

Na nsuka ya moyo ya Davidi, yandi vandaka kubambuka bansilulu ya Nzambi me pesa yandi. Nzambi me sila nde lumbu mosi, fami ya Davidi ta butila beto Mesia, Ngulusi. Mesia yina ta yala mvu ya mvu. Kiese na kiese na yo.

Davidi kwikilaka promese ya Nzambi. Beto mpi lenda tula ntima nde yonso Nzambi me sila, Yandi ta lungisa yo.

♥ Verse ya bubu yai :

...Yandi me wakana ti mono/ kuwakana ya kukonda nsuka,/

kuwakana mosi/ ya Yandi ta bebisa ve,/ ya Yandi ta landaka tii kuna/...2 Samuele 23 :5

[Bana ya ke lwata kulere mpembe tuba yo, bana ya ke lwata blue, rouge, etc.]

👤 Bankunga ya kwenda nzila mosi ti lesu :

Bana yimba nkunga mosi ya ke kwenda nzila mosi ti lesu yai.

👤 Devoir sambu na bakristo :

Beno bakristo, ntangu ya nge ke wa Bible, keti nge ke tula ntima na yonso ya Nzambi tuba? Kana ve, tula ngolo kusala yo mposho yai.

✝ Kubinga bavidu na Yesu :

Beno ya me yamba Yesu ntete ve, zaba mbote nde Nzambi me sila nde, na minute ya nge balula ntima ti tula lukwikilu na Mwana ya Yandi Yesu Kristo, Yandi ta gulusa nge mpi.

Bible ke tuba nde, “Kana nge ke ndimaka na munoko na nge na meso ya bantu yonso nde : “Yesu kele Mfumu,” ti kana nge ke kwikilaka na kati ya ntima na nge nde Nzambi tedimisaka Yandi na lufwa, nge ta guluka...konso muntu yina ta samba to ta binga zina ya Mfumu Nzambi, yandi ta guluka.” (Roma 10 :9,10,13)

Beto ta vanda na kiese kusadisa nge na mambu yina. Kaka bikala na nima ya ecodim bubuyai.

Kana ntangu lunga,


📖 Longa mikanda ya Bible :

(Bangindu kele na nsuka ya mukanda yai.)

==NSUKA YA LESO 12

Leso 12

**...Yandi me
wakana ti
mono
kuwakana
ya kukonda
nsuka,**



**kuwakana mosi ya Yandi ta bebisa
ve,
ya Yandi ta landaka tii kuna...**

2 Samuele 23 :5

Leso 13 Davidi pesaka makabu ya mbote na Nzambi.

1 Bansangu 21: 18-28, 2 Samuele 24 :18-25

I. Preparasio ya Moniteur—

🎯 Kikuma ya lesa :

Bana ta pesa Nzambi makabu ya ke lomba bo mosi kusala.

♥ Verse ya bubu yai :

Kansi Ntotila Davidi nde:/ « ...Mono ke zola ve kubaka bima na nge,/ mono pesa yo makabu na Mfumu Nzambi./ Mono ta pesa ve makabu/ ya bima ya mono me futa kima ve !/» 1 Bansangu 21 :24

🗣️ Nkunga ya kwenda nzila mosi ti lesa :

Beno Pesa Makabu
(Traditionel Congolais)

Beno, baleki, beno pesa makabu
Na nzo ya Nzambi nkembo ikele ! (2X)

Beno, babakala, beno pesa makabu
Na nzo ya Nzambi nkembo ikele ! (2X)

Mvutu :

Nkembo! Alelu y-a-a !
Na nzo ya Nzambi nkembo ikele ! (2x)

II. Revisio—

👆 Kuyindula diaka baleso me luta:

Beto me kuma penepene na nsuka luzingu ya Mfumu Davidi. Beto me mona luzingu na yandi na mikanda ya 1 Samuele ti 1 Bansangu.

III. Kulonga Leso Yai—

🎯 Kuyantika :

Mwana zina ya Pepe kwendaka na ecodim konso mposi. Konso mposi tata na yandi pesaka yandi mwa-dikabu ya fioti sambu yandi pesa yo makabu na ecodim. Kansi mposi mosi, Pepe tubaka na Papa nde, « Mono zola diaka ve nge kupesa mono dikabu ya ecodim. Keti mono lenda sala ndambu kisalu, nge futa mono ata ndambu ? Mpidina, mono ta baka

mbongo na mono mosi kupesa makabu na mono. »

Papa vutulaka nde, « Mono ta vanda na kiese kupesa nge makabu. Nge fweti sala kima ve. » Kansi Pepe tubaka kaka nde, « Ve, papa. Pardo, bika mono sala, mono kuzwa ata kima ya fioti. Mono pesa makabu na mono mosi. » Papa ndimaka nde yina vandaka ngindu ya mbote.

Mfumu Davidi na Bible vandaka na ngindu bonso yo.

🌟 **Developpement (Malongi ya nene ya lesa yai na banti ya malongi 4) :**

13.1 Na nsuka ya luzingu ya Davidi, bantu ya Israele salaka mbi diaka. Nzambi pesaka bo ndola ya maladi ya lufwa. Ntangu yina, wanzio songaka profete Gadi kukwenda kusonga Davidi kutunga mesa-kimenga, kupesa Nzambi makabu.

📖 **Tangila bana :** 1 Bansangu 21 :18-19

21 :18 Wanzio ya Mfumu Nzambi tubaka na profete Gadi nde : « Songa Davidi, yandi kwenda ...kutungila Mfumu Nzambi mesa-kimenga. :

19 Gadi salaka mpidina, ebuna Davidi landaka ndinga ya Mfumu Nzambi, yandi kwendaka mutindu Gadi songaka yandi.

❓ **Yula bana bakestio.**

🏠 **Bana sala bageste.**

🗣️ **Bana yimba ti kina.**

13.2 Davidi kwendaka kupesa makabu na Nzambi bonso profete Gadi me songa yandi. Yandi lombaka nkwa ya sika yina kutekila yandi ntoto.

📖 **Tangila bana :** 1 Bansangu 21 :21-22

21 Ntangu Arauna monaka nde ntotila Davidi ke kwisa, yandi katukaka na kisika yina, yandi bwaka ilungi na ntoto na meso ya Davidi.

22 Davidi tubaka na yandi nde : «...mono ke zola kutungila Mfumu Nzambi mesa-

kimenga sambu maladi yai ya lufwa me simba bantu na beto, yo mana. Tekila mono yo. Mono ta futa nge mbongo. »

? Yula bana bakestio.

🕯 Bana sala bageste.

👤 Bana yimba ti kina.

13.3 Nkwa ya sika yina zolaka kupesa Davidi ntoto ti ata mbisi ti mabaya ya mpampa. Kansi Davidi buyaka kubaka yo ya mpamba. Yo yina, yandi sumbaka yo ti pesaka makabu.

📖 Tangila bana : 1 Bansangu 21 :23-26a

23 Arauna tubaka nde : « Mfumu, baka yo. Sala konso kima ya nge me zola. Tala bangombe na mono yai ti ble. Nge baka yo sambu na kupesila makabu. Awa kele mabaya... Nge sadila yo nkuni ya kuyokila makabu. Mono me pesa nge bima yai yonso. »

24 Kansi Ntotila Davidi nde : « Kele ve. Mono ke sumba yo na mbongo. Mono ke zola ve kubaka bima na nge, mono pesa yo makabu na Mfumu Nzambi. Mono ta pesa ve makabu ya bima ya mono me futa kima ve ! »

25 Ebuna Davidi pesaka Arauna bibende ya wolo 600 sambu na kusumba kisika yango.

26a Yandi tungaka mesa-kimenga pana, ebuna yandi pesaka Mfumu Nzambi makabu...

13.4 Ebuna Nzambi ndimaka makabu ya Davidi pesaka. Yo yina, maladi ya bantu vandaka kumana.

📖 Tangila bana : 1 Bansangu 21 :26b, 2 Samuele 24 :25c

1 Bans. 21 :26b Yandi sambaka Mfumu Nzambi. Nzambi ndimaka kusamba na yandi. Yandi tindaka tiya sambu na kuyoka makabu yina vandaka na zulu ya mesa-kimenga.

1 Sam. 24 :25c « ...maladi ya lufwa mpi manaka na ntoto ya Israele. »

? Yula bana bakestio.

🕯 Bana sala bageste.

👤 Bana yimba ti kina.

>|< Kumanisa :

Davidi bakisaka nde, kana muntu me futa kima ve to me sala kima ve sambu na makabu, yo kele ve mbote na meso ya Nzambi. Yo me katuka ve na ntima na yandi. Nki mutindu nge lenda pesa makabu ya mbote na Nzambi ?

♥ Verse ya bubu yai :

Kansi Ntotila Davidi nde:/ « ...Mono ke zola ve kubaka bima na nge,/ mono pesa yo makabu na Mfumu Nzambi./ Mono ta pesa ve makabu/ ya bima ya mono me futa kima ve ! » 1 Bansangu 21 :24

[Moniteur, bana tuba verse fraze na fraze na bageste.]

👤 Bankunga ya kwenda nzila mosi ti lesu :

Bana yimba nkunga mosi ya ke kwenda nzila mosi ti lesu yai.

👋 Devoir sambu na bakristo :

Beno bakristo, devoir mono ke pesa beno mposo yai, yo yai : Sosa mpila ya kusala ndambu kisalu, nge kuzwa makabu ya nge mosi. Nge nata yo na Nzambi na mposo ke kwisa.

✝ Kubinga bavidu na Yesu :

Beto me kuma na nsuka ya luzingu ya Davidi. Na mukanda ke kwisa, 1 Bantotila, beto ta mona lufwa na yandi. Lumbu mosi, beto yonso ta manisa luzingu na beto. Na lumbe yina, yo ta vanda nki mutindu sambu na nge ?

Bible ke tuba nde Nzambi zaba dezia nani kele muntu na Yandi. (2 Timothée 2 :19) Yandi zaba nki sambu na nge ? Keti Yandi zaba nde kieleka, nge me tula Yandi ntima ? Kana nge zaba ve mbote-mbote, kudilosa na Yandi bubuyai. Balula ntima na nge. Kuma mulandi ya Yesu. Yandi kaka lenda gulusa nge.

Kana ntangu lunga,

📖 Longa mikanda ya Bible :

(Bangindu kele na nsuka ya mukanda yai.)

==NSUKA YA LESO 13

Leso 13



***Kansi Ntotila
Davidi nde :***

***« ...Mono ke zola ve kubaka bima
na nge, mono pesa yo makabu na
Mfumu Nzambi.***

***Mono ta pesa ve makabu ya bima
ya mono me futa kima ve ! »***

1 Bansangu 21 :24

Leso 14 Revisio

- **Linya ya Ntangu (p.51-52)**

Sadila Linya ya Ntangu kusonga mambu ya salamaka na mukanda ya 2 Samuele, yo me landa nki na histoire ya Israele.

Songa badate ya yo me salama. Songa bantu ya nene ti makambu ya nene ya salamaka.

- **Nki Luswaswanu?**

1 Samuele ti 2 Samuele, yonso zole songa luzingu ya Davidi mingi. 1 Samuele songa luzingu na yandi na ntwala yandi kumaka ntotila. 2 Samuele songa luzingu na yandi na nima yandi kumaka ntotila. Songa yai na Linya ya Ntangu.

- **Sambu na nki beto tanga Davidi, Davidi, Davidi ?**

Bible ke songa luzingu ya Davidi mingi sambu Nzambi silaka nde fami na yandi ta buta Mesia ya ta yala mvu ya mvu. Yozefi ti Maria, bo yonso zole vandaka bana ya Davidi. Tala Matayo 1 :1, 1 :6, 1 :20, Luka 3 :31. Ntangu bantu bingaka Yesu “Mwana ya Davidi,” bo vandaka kundima nde Yandi vandaka Mesia.

- **Nsaka: Mono nani ?**

Sonika bakestio yai na bitini ya papier, mosi-mosi. Pesa kitini mosi na mwana. Yandi telama na ntwala ya kalasi. Yandi tanga papier na yandi. Bana ya nkaka fweti tuba yandi kele nani.

1) Mono vandaka na makulu ya kifu, kansi Mfumu bingaka mono sambu mono kudia na meso na yandi.

(Mefibosheti)

2) Mono mwana ya Davidi salaka rebelio sambu mono simba kimfumu ya tata.

(Absalomi)

3) Davidi monaka mono kuyobila, ebuna yandi salaka masumu ya nene ti mono.

(Batsheba)

4) Mono profete songaka Davidi mbi ya yandi salaka na nkento Batsheba.

(Natani)

5) Mono profete songaka Davidi kupesa makabu na Nzambi sambu ndola ya maladi ya lufwa kumana.

(Gadi)

6) Mono zolaka kutunga nzo-Nzambi, kansi Nzambi buyaka. Yandi tubaka nde mwana na mono ta tunga yo.

(Davidi)

7) Mono sonikaka bankunga ya kumisa Nzambi, ti mono tulaka mikanda mingi na mukanda ya bankunga.

(Davidi)

8) Mono mfumu ya basoda ya Davidi. Mono fwaka Absalomi.

(Yoabi)

9) Mono kele muntu ve, kansi mono kele kima. Lukumu ya Nzambi ke monika na mono.
Muntu fwaka sambu yandi simbaka mono.
(Sanduku ya Kuwakana ya Nzambi)

• **Nki ta landa na nima ?**

Penepene na nsuka ya 2 Samuele, Davidi tubaka bandinga na yandi ya nsuka. Nki nge banza ta landa kana beto yantika kutanga mukanda ya 1 Ntotila?
(Lufwa na Yandi)

Kana ntangu lunga, reviser baverse ya Bible ti mikanda ya Bible.

 **Bangindu sambu na kulonga mikanda ya Bible :**

Moniteur, longa kitini mosi ya fioti na nsuka ya konso lesu, kana ntangu kulunga.

Histoire ya Kimfumu ya Davidi kele na kati ya kimvuka ya mikanda ya beto binga “Histoire ya bantu ya Israele na nsi na bo”.

Na nkufi, beto binga bo “Mikanda ya histoire.” Mikanda yai kele 12:

Yozue

Bazuze

Ruthi

1 & 2 *Samuele* ←

1 & 2 Bantotila

1 & 2 *Bansangu* ←

Ezdrasi

Nehemia

Estere.

Beto ta mona
histoire kiteso mosi
mbala mingi na
mikanda yai.

Mikanda ya 2 Samuele ti 1 & 2 Bantotila songa histoire ya Kimfumu ya Israele.

1 & 2 Bansangu kele revisio ya histoire ya sonikama na nima. Yo yantika na dikanda ya Adami ti suka na dikanda ya Davidi. Yo ke songa nde Ntotila ya kuluta nene na kwisa na dikanda ya Davidi. Ntotila yina ta vanda Mesia.

2 Samuele ke landa histoire ya Israele, kansi 1 Bansangu kele na materiels kiteso mosi. Bo sonikaka yo bamvula mingi me luta bonso revision ya histoire ya Israele.

1 Bansangu yantika na genealogie ya nda to liste ya nda ya bibuti ya fami ya Mfumu Davidi. Yai kele sambu fami ya Davidi fweti butila beto Mesia.

Bana ya niveau secondaire, kana bo me longuka mikanda ya histoire ya Israele na kikongo, bo lenda longuka yo na français mpi.

Mikanda ya Histoire ya Israele na français:

Josué

Juges

Ruth

1 Samuel



2 Samuel

1 Rois

2 Rois

1 Chroniques

2 Chroniques



Esdras

Néhémie

Esther

Na nima bo me zaba yonso zole, nge lenda songa bo mukanda mosi na Kikongo, bo pesa zina ya mukanda yina na français, to nge tuba na français ti bo pesa kikongo.

Bo yimba nkunga,

MIKANDA YA KUWAKANA YA NTAMA

Mikanda ya Moize, Moize, Moize,
Mikanda ya Moize—Bansiku-Nzambi !
Kuyantika, Kubasika, e Levi, Kutanga
Ye nsuka ke Kulonga, Mikanda ya Moize !

Mikanda ya histoire, histoire, histoire,
Mikanda ya histoire—Histoire ya Bayuda !
Yozue, Bazuzi, ye Ruti, ti BaSamuele,
Ye Bantotila, Basangu, ye Esdrasi
Nehemia, ye Estere, Mfumu-Nkento
Yai yonso kumi na zole mikanda ya histoire.

Kumona yo na Bible :

Nge mpi lenda nata baBible na kalasi, ti sadisa bo kumona mikanda yai na kati ya Bible.

Mikanda ya poesie ikele tanu :

Yobi
Bankunga



Bingana
Longi



Kuluta Kitoko

Bantu yina me niema Bible me tula bo na groupe na bo mosi, sambu beto bakisa nde bo kele poesie. Yobi ke tadila ntangu ya Abrahami na mukanda ya Kuyantika. Mfumu Davidi sonikaka ti vukisaka mingi ya Bankunga. Mikanda tatu ya nsuka—Bingana, Longi ti Kuluta Kitoko kele kisalu ya Salomo, mwana ya Davidi yina yingaka yandi. Mukanda ya Bankunga ikele mukanda mosi ya nene, ya nda. Yo kele na bakapu 150. Bankunga kapu 119 kele kapu ya kuluta nda na Bible ya mvimba. Yo kele na baverse 176. Yonso ke tadila kitoko ya ndinga ya Nzambi.

Bana yimba mikanda ya poesie :

Mikanda ya poesie, poesie, poesie
Mikanda ya poesie, bankunga ya Nzambi
Yobi ya kangaka ntima, Bankunga ya Davidi,
Bingana ya mayele, 'Buna Longi ye Kitoko.
Yai yonso mikanda tanu, mikanda ya poesie.

###